

# NÜXĪRAÜXÜ GA POPERA GA CORĪTIUCŪĀX GA YAXŌGÜXÜTANÜWA NAMUXÜ GA PAURU

*Pauru rü nüxü narümoxē ga yema yaxōgüxü ga Corĭtiuarü ĩānewa yexmagüxü*

1-2 Pa Chaueneēgü i Corĭtiucŭāxgüx, choma i Pauru nixĭ i Tupana yaxuxü norü ngüchaxümaã na Ngechuchu ya Cristu norü puracüwa choxü namuxücèx. Rü choma rü namaã i taeneē i Chótene nixĭ i pexü tarümōxēgüxü rü pexcèx tanaxümatüxü i ñãã popera. Pa Chaueneēgü ya Tupanaärü Ixĭgüxex, pema rü marü Tupanapēxewa pixüüne yerü Ngechuchu ya Cristu marü pexü nixüünexēē. Rü Tupana rü marü pexü nade na norü duüxügü pixĭgüxücèx wüxigu namaã i guxüma i ngēma duüxügü i guxüwama tórü Cori ya Ngechuchu ya Cristuxü icuèxüügüxü. Rü nüma ya Ngechuchu ya tórü Cori ixĭcü, rü ngēma duüxügüarü Cori ta nixĭ. <sup>3</sup> Rü chanaxwèxe ya Tanatü ya Tupana rü tórü Cori ya Ngechuchu ya Cristu norü ngechaxügagu poraãcü pexü narüngüxēē rü pexü nataãèxēē.

*Tupana tüxü narüngüxēē erü Cristuarü duüxügü tixĭgü*

<sup>4</sup> Rü taguma nüxü charüchau na Tupanana moxē pexcèx chaxāxü. Rü moxē nüxna chaxā naxcèx i ngema ngüxēē i Ngechuchu ya Cristugagu Tupana pexna ãmarexü. <sup>5</sup> Yerü Cristugagu Tupana

peyna nanamu ga Naãxê i Ûünexũ na pemaxã inaxãúxúcèx. Rũ peyna nanaxã ga norũ ore, rũ naétũ pexũ nanatauxchaxêê na nũxũ pecuáxúcèx na ñuxũ ñaxũchiga yixĩxũ. <sup>6</sup> Rũ yemaãcü yexguma nũxũ pexĩnüëgu ga yema ore ga Cristuchiga rũ aixcüma peyaxõgũ. <sup>7</sup> Rũ ngẽmacèx i ñuxma na ípenanguxêêxũ na wena táxarũ núma naxũxũ ya tórũ Cori ya Ngechuchu ya Cristu, rũ Tupana peyna nanaxã i taxũ i cuèx na taxuũma pexũ taxuxúcèx na naxcèx pemaxêxũ. <sup>8</sup> Rũ ngẽmaãcü tá peyna nadau ya Tupana ñuxmatáta nagũ i naãne, rũ guxũgutáma pexũ naporaexêê na aixcüma peyaxõgũamaxúcèx rũ naxcèx pemaxêxúcèx, na taxuema chixexũmaã pexũ ixugũxúcèx i ngẽxguma wenaxãrũ núma naxũxgu ya tórũ Cori ya Ngechuchu ya Cristu. <sup>9</sup> Rũ Tupana rũ guxũguma nayanguxêê i norũ uneta. Rũ núma nixĩ ga pexũ nadexũ na aixcüma Nane ya tórũ Cori ya Ngechuchu ya Cristumücũgũ pixĩgũxúcèx.

### *Nũgũ nitoye ga yema yaxõgũxũ*

<sup>10</sup> Pa Chaueneëgũx, tórũ Cori ya Ngechuchu ya Cristuégagu pexũ chacèxũ na wũxigu pegũmaã perũxĩnüëxũ rũ tama pegũ pitoyexúcèx. Rũ name nixĩ i aixcüma pegũ pengechaũgũ rũ aixcüma wũxigutama perũxĩnüë i peãëwa. <sup>11</sup> Pa Chaueneëgũx, pemaã nũxũ chixu i ngẽma ore, yerũ Croétanũxũtanũwa nũxũ chacuáchiga ga pegũmaã na penuëxũ, rũ tama aixcüma wũxigu na perũxĩnüëxũ. <sup>12</sup> Rũ pemaã nũxũ chixu i ngẽma erũ ñuxre i pema rũ ñaperũgũgũ:

“Choma rũ Pauruwe charũxũ”, ñaperũgũgũ. Rũ togue rũ:

“Choma rü Aporuwe charüxü”, ñaperügügü. Rü togue rü:

“Choma rü Pedruwe charüxü”, ñaperügügü. Rü togue rü:

“Choma rü Cristuwe charüxü”, ñaperügügü.

<sup>13</sup> ¿Rü ñuxãcü nixĩ i ngẽma? ¿Pexcèx rü Cristu rü marü niyauxye? ¿Éxna pema nüxü pecuèxgu rü choma i Pauru chiixü ga curuchawa pexcèx chipotaxü rü chayuxü? ¿Rü êxna pema nüxü pecuèxgu rü chauégagu yïixü ga ípebaiüxü?

<sup>14</sup> Rü Tupanana moxẽ chaxã, yerü taxúema pexü íchabaiüxẽẽ ga pemax. Rü Crispu rü Gayuxicatama nixĩ ga íchabaiüxẽẽxü. <sup>15</sup> Rü ngẽmacèx taxucürüwa texé tügü tixu na chauégagu ítabaiexü.

<sup>16</sup> Rü yemáãcü aixcüma íchanabaiüxẽẽ ga Estéfanatanüxügü ta, natürü chauxcèx rü taxúema ga togue tüxü íchabaiüxẽẽ.

<sup>17</sup> Yerü nüma ga Cristu rü tama choxü namu ga duüxügüxü na íchabaiüxẽẽxücèx, natürü choxü namu na duüxügümaã nüxü chixuxücèx i norü ore i mexü i tüxü maxèxẽẽxü. Rü nanaxwèxe i tauxchaxü i oremaã nüxü chixu i ngẽma ore. Erü ngèxguma chi ñoma nüxü cuèüchixürüü nüxü chixuxgu i ngẽma ore, rü ngürüächi i duüxügü rü tá chauguama narüxĩnüé rü tá nüxü inayarüngümaẽ na Cristu yïixü ga tüxü maxèxẽẽcü ga yexguma curuchagu nayuxgux.

*Cristuwa nixĩ ga Tupana inawéxü ga norü pora rü norü cuèx*

<sup>18</sup> Rü ngẽma ore na ñuxãcü tórü pecaducèx curuchagu nayuxü ga Cristu, rü wüxi i natücèxmamare nixĩ naxcèx i ngẽma duüxügü

i poxcuwa ĩxũ. Natürü yixema na Tupana tũxũ maxẽxẽẽxũ, rü nüxũ tacuèx na ngẽma ore rü Tupanaãrũ pora yĩxũ. <sup>19</sup> Erü norü ore i ümatũxũwa rü ñanagürü ga Tupana:

“Rü tá ichayanaxoxẽẽ i guxũma i norü cuèx i ngẽma duũxũgü i nüxũ cuèxüchigũxũ. Rü tá nüxũ chaxo i ngẽma duũxũgüarü cuèx”,

ñanagürü. <sup>20</sup> Rü ñuxmax, Pa Chaueneẽgũx, ¿Tupanapẽxewa rü tacüwa namexũ i ngẽma duũxũgü i poraãcü nüxũ cuèxüchixũ? ¿Rü tacüwa namexũ i ngẽma duũxũgü i Moĩché ümatũxũ i mugüwa nguxẽẽtaegũxũ? ¿Rü tacüwa namexũ i ngẽma duũxũgü i meã nüxũ cuèxgũxũ i ñoma i naãneãrũ cuáchigagu na yadexagũxũ? Erü guxũma i ngẽma cuèx i duũxũgü nagu rüxĩnũẽxũ rü Tupanacèx rü taxuwama name. <sup>21</sup> Natürü nüma ya Tupana ya guxũxũma cuácü, rü tama nanaxwèxe na ñoma i naãnecũĀx i duũxũgüarü cuágagu na yĩxũ i naxũtawa nangugũxũ i nümagü. Natürü nanaxwèxe na ngẽma norü ore i mexũgagu na yĩxũ i namaxẽxẽẽãxũ i ngẽma duũxũgü i yaxõgũxũ woo togücèx rü natücèxmamare yixĩgu i ngẽma ore. <sup>22</sup> Ngẽma Yudíugü rü nüxũ nadaugüchaũ i cuèxrũgü i Tupanaãrũ poramaã üxũ. Rü ngẽma Griégugü rü naxcèx nadaugü i ñoma i naãneãrũ cuèx. <sup>23</sup> Natürü ngẽma ore i toma nüxũ tixuxũ, rü Cristu ga curuchawa ipotacüchiga nixĩ. Rü ngẽma ore rü naãewa nangux i ngema Yudíugü. Rü ngẽma duũxũgü i tama Yudíugü ixĩgũxũcèx rü wüxi i natücèxmamare nixĩ. <sup>24</sup> Natürü ngẽma duũxũgü i Tupana dexũ i Yudíugü rü ẽxna tama Yudíugü ixĩgũxũ rü ngẽma duũxũgücèx

Tupana inanawẽx i norü pora rü norü cuèx ga yexguma pecaducèx nayuxgu ga Cristu. <sup>25</sup> Rü yema Tupana üxü ga yexguma nayuxgu ga Cristu rü muxüma i duüxügücèx rü wüxi i ngẽãẽmare nixĩ. Natürü ngẽma Tupana nagu rüxĩnũxü rü guxüma i ñoma i naãnecüãx i duüxügüarü cuèxarü yexera nixĩ. Rü yexguma curuchagu nayuxgu ga Cristu rü muxüma ga duüxügücèx rü natura ga Tupana ga yexguma. Natürü yexguma nixĩ ga inawéãxü ga ñuxãcü guxü i duüxügüarü yexera na naporaxüchixü. <sup>26</sup> Pa Chaueneẽgüx, name nixĩ i nagu perüxĩnũẽ na ñuxãcü Tupana pexü dexü na norü duüxügü pixĩgüxücèx. Rü noxretama pixĩgü na nüxü pecuèxüchixü ega duüxügü pexü ngugügu, rü noxretama pixĩgü na ãẽxgacügü pixĩgüxü, rü noxretama pixĩgü i ngẽma itaarü dïeruãxütanüxü pixĩgüxü. Natürü woo ngẽma na pixĩgügu rü Tupana rü pexü nade na norü duüxügü pixĩgüxücèx. <sup>27</sup> Rü Tupana nanade ga yema duüxügü ga togü ga duüxügü nüxü ixuxgu rü taxuüma icuáxü. Rü yemaãcü nanaxü ga Tupana na naxãneẽxẽãxücèx i ngẽma duüxügü i nüxü icuèxüchixü. Rü Tupana nanade ga yema duüxügü ga togü nüxü ixuxgu rü turaexü. Rü yemaãcü nanaxü ga Tupana na naxãneẽxẽãxücèx i ngẽma duüxügü i poraexü. <sup>28</sup> Rü Tupana nanade ga yema duüxügü ga togü nüxü oexü, rü ñoma i naãnewa taxuüma ixĩgüxü. Rü yemaãcü Tupana nanaxãneexẽẽ i ngẽma duüxügü i ñoma i naanewa norü ngemaxügümaã nügü icuèxüügüxü. <sup>29</sup> Rü ngẽmacèx taxucürüwama texé tügü ticuèxüü i Tupanapẽxewa. <sup>30</sup> Rü

nümatama ga Tupana nixĩ ga Ngechuchu ya Cristuarü duũxügüxü pexü yaxĩgüxëẽxü. Rü tatanüwa nanamu ga Cristu na nüma tüxna naxããxücèx i cuèx i aixcüma ixĩxü, rü pecaduwa tüxü ínanguxüxëẽxücèx. Rü nüma ya Cristu nixĩ i tüxü namaxëxëẽxü rü tüxü yamexëẽgüxü na aixcüma ixüünexücèx napëxewa ya Tupana. <sup>31</sup> Rü ngëmacèx i Tupanaãrü ore i ümatüxüwa rü ñanagürü:  
 “Rü ngëxguma texé tügü icuèxüüchaũgu rü name nixĩ i tórü Corixü ticuèxüü”,  
 ñanagürü.

## 2

### *Cristu ga curuchawa ipotacüchiga*

<sup>1</sup> Pa Chaueneëgüx, yexguma noxri petanüwa chaxüxgu na pemaã nüxü chixuxücèx ga Tupanaãrü ore i aixcüma ixĩxü i Cristuchiga, rü tama ñoma nüxü cuèxüchixürüüãcüma pemaã chidexa, rü tama ore ga guxchaxümaã nixĩ ga pemaã nüxü chixuxü. <sup>2</sup> Yerü yexguma petanüwa chayexmagu, rü Cristuchigaxüxĩcatama nixĩ ga pemaã chixuxü. Rü taxuüma ga tacü ga togu charüxĩnü. Rü yemaãcü Ngechuchu ya Cristu ga curuchawa ipotacüguxicatama nixĩ ga charüxĩnüxü. <sup>3</sup> Rü yexguma petanüwa changuxgu rü nüxü chadau ga taxü ga guxchaxügü ga petanüwa, rü yemacèx poraãcü chaxoegaãë rü Tupanapewa chorü muümaã chidurux.  
<sup>4</sup> Rü yexguma pemaã chideaxgu rü pemaã nüxü chixuxgu ga Tupanaãrü ore, rü tama ñoma nüxü cuèxüchixürüüãcüma pemaã nüxü chixu na yemaãcü pexü chanangüchaũxëẽxü na

peyaxôgüxüçèx. Natürü Tupanaãe i Üünexüârü ngüxêemaã rü Tupanaârü poramaã nixî ga pexü chanangúchaüxêexü. <sup>5</sup> Rü yemaãcü Tupanaârü poramaã pemaã nüxü chixu ga yema ore na Tupanagagu yîxü na nüxü peyaxôgüxü, rü tama ñoma i naãnecüãx i duüxügüarü cuágagu na yîxü.

*Tupana rü Naãe i Üünexüwa nügü tüxü nacuéxêe*

<sup>6</sup> Natürü pemaã nüxü chixu, rü ngëxguma natanüwa changëxmagu i ngëma duüxügü i marü meãma yaxôgüxü, rü ngëxguma nixî i chanangúexêexü i ngëma aixcüma Tupanaarü cuèx i üünexü. Natürü ngëma cuèx rü tama ñoma i naãnewa ne naxü, rü bai i ñoma i naãneârü ãëxgacügü i paxa tá iyarüxoxüwa ne naxü. <sup>7</sup> Natürü ngëma cuèx rü Tupanawa nixî i ne naxüxü. Rü ngëma cuèx nixî ga noxri tauta naãne üxgu Tupanaxîcatama nüxü cuáxü ga na ñuxãcü tá tüxna naxããxü i maxü i taguma gúxü. <sup>8</sup> Natürü yema Tupana nagu rüxînüxü, rü taxuüma ga ñoma ga naãnecüãx ga ãëxgacü nüxü nacuéx. Yerü yexguma chi aixcüma nüxü nacuéxgügu ga yema Tupana nagu rüxînüxü rü tãu chima curuchawa nayapotagü ga guma mecü ya tórü Cori. <sup>9</sup> Rü ngemachiga nixî i Tupanaârü ore i ümatüxüwa i ñaxü:

“Rü ngëma duüxügü i Tupanaxü ngechaügüxüçèx, rü nüma nanamexêe i tacü i taxúema nüxü dauxü, rü taguma texé nüxü ñnüxü, rü bai i texé nagu rüxînüxü”,

ñaxü. <sup>10</sup> Rü ngëma Tupana mexêexü naxcèx i ngëma duüxügü i nüxü ngechaügüxü, rü ñuxma rü tüxü nüxü nacuéxêe i ngëma, yerü núma nanamu

ga Naãe i Üünexũ na taxcèx nangoxêẽãxũcèx. Rũ ngẽma Naãe i Üünexũ rũ guxũxũma nacuèx, rũ èixrũxũ i ngẽma Tupanaxĩcatama nũxũ cuáxũ rũ ta nũxũ nacuèx. <sup>11</sup> Rũ duũxũgũtanũwa rũ çtexé nũxũ tacuèx na tacũgu naxĩnũxũ i wũxi ya yatü? Rũ naãẽxĩcatama nixĩ i nũxũ cuáxũ i ngẽma nagu naxĩnũxũ i ngẽma yatü. Rũ ngẽxgumarũũ ta Tupanaãe i Üünexũxĩcatama nixĩ i nũxũ cuáxũ na tacũgu naxĩnũxũ ya Tupana. <sup>12</sup> Rũ yixema rũ tama ñoma i naãnecũãx i naãe nixĩ ga iyauxgũxũ. Natürũ tanayauxgũ i ngema Naãe i Üünexũ ga Tupana taxcèx núma muxũ na aixcũma nũxũ icuáxũcèx i guxũma i ngẽma mexũgũ ga Tupana norũ ngechaũmaã tũxna ãmarexũ. <sup>13</sup> Rũ ñuxma na pemaã nũxũ tixuxũ i ngẽmachiga, rũ Tupanaãe i Üünexũ toxna ãxũ i oremaã nixĩ i pemaã nũxũ tixuxũ. Rũ tama ore i torũ cuèxwa tayaxuxũmaã nixĩ i pemaã nũxũ tixuxũ. Rũ ngẽmaãcũ nũxũ tixu i Tupanaãe i Üünexũãrũ ore namaã i ngẽma duũxũgũ i aixcũma Tupanaãe nawa ngẽxmagũxũ. <sup>14</sup> Rũ texé ya tama Tupanaãe i Üünexũ tũmawa ngẽxmaxẽ, rũ taxucürũwa tanayaxu i ngẽma Tupanaãe i Üünexũ tũxũ nguxẽẽxũ, erũ tũmacèx ya yixema duũxẽ rũ natücèxmamare nixĩ. Rũ tama nũxũ tacuèxéga erũ yixema Tupanaãe i Üünexũ tũmawa ngẽxmaxẽxĩcatama tixĩ ya nũxũ cuáxe na tanangugũxũ na ñuxũ ñaxũchiga yiĩxũ i ngẽma Tupanaãe i Üünexũ tũxũ nguxẽẽxũ. <sup>15</sup> Rũ yixema duũxẽ ya Tupanaãe i Üünexũ tũmawa ngẽxmaxẽ, rũ meã tanangugũ i guxũma. Natürũ ngẽma togũ i duũxũgũ i tama Tupanaxũ cuèxgũxũ, rũ tax-



ucürüwama tümaārü maxūxū nangugü ya yixema duūxē ya aixcūma Tupanaāē tūmawa ngēxmaxē.

<sup>16</sup> Erü Tupanaārü ore i ūmatūxūwa rü ñanagürü:

“¿Texé nüxū tacuèx na tacūgu naxīnūxū ya tórü Cori? ¿Rü texé nüxū tacuèx na Tupanaxū taxucuxēxū?”

ñanagürü. Natürü yixema nixī i aixcūma nüxū icuáxū i ngēma Cristu nagu rüxīnūxū.

### 3

*Pauru rü Aporu rü wūxigu Tupanaāxī napuracūe*

<sup>1</sup> Pa Chaueneēgūx, yexguma noxri petanūwa changuxgu, rü taxucürüwa ngēma duūxūgü i Tupanaāē nawa ngēxmaxūmaā chidexaxürüūācū pemaā chidexa. Natürü ñoma i naānecūāx i tama Tupanaxū cuèxgūxūmaā chideaxgurüū nixī ga pemaā chidexaxū. Yerü pema rü yexwacèx, peyaxōgü ga yexguma, rü yemacèx yexwacèx yaxōgūxūmaā chideaxürüūācū pemaā nüxū chixu ga Cristuchiga. <sup>2-3</sup> Rü tauxchaxū ga oremaā pexū changúexēē, ngēxgumarüū i wūxi i õxchana ega noxri nabuxgu rü naēgūnenixū ya tauxchaācū yaxaxūne nüxna taxā. Rü yemaācū tauxchaxū ga oremaā pemaā nüxū chixu ga Tupanaārü ore ga noxrix, yerü taxucürüwa nüxū pecuèxéga ga Tupanaārü ore ga guxchaxū. Rü ñuxma rü ta tama nüxū pecuèxéga i Tupanaārü ore i guxchaxū, erü ñoma tama yaxōgūxū i duūxūgürüūtama pemaxē. Rü dūcax, ngēxguma ñuxma rü ta pixāūxāchiwèxegu rü pegūmaā penuēgu, rü ngēmawa nangox na ngēma tama yaxōgūxürüūacūtama nagu perūxīnūēxū rü ñoma i naānecūāxürüūacūtama

na pemaxêxũ. 4 Rũ ngêxguma petanüwa wüxie ñágügu rü:

“Choma rü Pauruwe charüxũ”, ñágügu, rü togue rü:

“Choma rü Aporuwe charüxũ”, ñágügu, rü ngêma wa nüxũ tacuèx na ngêma duïxüğü i tama yaxögüxürüüâcüma na pemaxêxũ. 5 Rũ ngêxguma meã nagu rüxĩnüëgu, ¿rũ tacü chixĩ i choma i Paurux? rü ¿tacü nixĩ i nüma i Aporux? Toma rü Tupanaârü duïxüğümare tixĩgü, rü togagu nixĩ ga nüxũ peyaxögüxũ ga tórü Cori ya Ngechuchu. Rũ wüxichigü ga toma rü tanaxü ga yema puracü ga tórü Cori toxna ãxũ. 6 Rũ chauxütawa nixĩ ga nüxũ pexĩnüëxũ rü peyaxögüxũ ga Tupanaârü ore ga noxrix. Rũ Aporu nixĩ ga pexũ rüngüxêëcü na yexeraâcü meã peyaxögüxũ ga yema ore. Natürü Tupana nixĩ ga pexũ maxêxêëcü. 7 Rũ ngêmacèx woo yixema tuxira duïxüğümaã nüxũ ixuxe i Tupanaârü ore rü woo yixema wixwena yexeraâcü duïxüğüxũ ngüexêëxê, rü taxuüma tixĩgü. Natürü Tupana nixĩ ya guxüma ücü, erü nüma nixĩ i duïxüğüxũ namaxêxêëxũ. 8 Rũ ngêmaâcü ya yixema tuxira duïxüğümaã nüxũ ixuxe i Tupanaârü ore, rü yixema wixwena yexeraâcü duïxüğüxũ ngüexêëxê rü tawüxigumare i ngêma puracüwa. Natürü Tupana rü tá tuxũ nanaxütanü i tümaârü puracü ya wüxichigü ngêxgumarüü na ñuxãcü tanaxüxũ i ngema puracü.. 9 Rũ ngêmaâcü i toma rü wüxigu Tupanaãxũ tapuracüe. Rũ ngêmaâcü nixĩ i perü maxüwa napuracüxũ ya Tupana na nüma nanaxwèxexüâcüma pixĩgüxüçèx. 10 Rũ choma nixĩ ga Tupana choxũ muxũ na chaxira

pemaã nüxũ chixuxũcèx ga Cristuchiga. Rũ togũ nixĩ ga chowena yexeraãcü pexũ ngúexẽẽxũ. Natürũ guxãma ya texé ya naxúxe i ñaã puracũ rũ name nixĩ i taxuãẽ na meã tanaxũxũcèx. <sup>11</sup> Rũ ñaã puracũ rũ Ngechuchu ya Cristuwa nixĩ ga inaxügũxũ, rũ ngẽmacèx taxucürüwama texé tayangucuchixẽẽ i to i tüxũ maxẽxẽẽxũ. <sup>12</sup> Rũ ñuxma na norũ puracũ ixũxũ i wüxichigũ i yixema, rũ tanaxwèxe i taxuãẽ na aixcüma meã naxũxũ i ngẽma. Erũ yíxema aixcüma meã naxúxe i norũ puracũ, rũ ñoma wüxi i ĩpataarũ üruũ i uirumũ rũ dĭerumũ rũ nuta i mexèchixũmaã üpataxürũ tixĩ. Natürũ yíxema tama aixcüma meã naxúxe i ngẽma Cristuarũ puracũ rũ ñoma ĩpataarũ üruũ i chixexũ i naĩ rũ naĩxãtũ rũ dexnemenèxãmaremaã üpataxürũ tixĩ. <sup>13</sup> Natürũ ngẽxguma naguxgu i naãne, rũ tá nangox na ñuxãcü naxüãxũ i Tupanaarũ puracũ i wüxichigũ i duũxũ. Erũ ngẽma ngunexũgu rũ tá nangẽxma ya üxũ ya taxüchine. Rũ ñoma tacũ üxüwa iguxürũ tá nixĩ i Tupana nüxũ na üxũ i wüxichigũ i duũxũarũ puracũ na nüxũ nacuáxũcèx ngoxi aixcüma name rũ ěxna tama. <sup>14</sup> Rũ yíxema aixcüma meã naxúxe i Cristuarũ puracũ, rũ yima ĩpata ya taixũne ya tama üxümaã ixaxũnerũ tá nixĩ i ngẽma tümaarũ puracũ. Rũ tá Tupanaxütawa tanayaxu i tümaarũ natanũ naxcèx i ngẽma taxüxũ. <sup>15</sup> Natürũ yíxema tama aixcüma meã naxúxe i ngẽma puracũ, rũ yima ĩpata ya tama taixũne ya üxümaã ixaxũnerũ tá nixĩ i ngẽma tümaarũ puracũ. Rũ tá ngẽxma inayarüxomare i guxüma i ngẽma taxüxũ. Rũ tüxicatama tãütáma tixa ñoma wüxi i duũxũ i üxüemawa iyagoxürũ. <sup>16</sup> ¿Tama ěxna nüxũ

pecuèx i pema rü Tupanapata na pixĩgũxũ, rü ngema Naãe ya Tupana rü pewa na namaxũxũ?  
<sup>17</sup> Rŭ ngẽxguma texé pexũ chixetanũxẽẽgu, rü Tupana tá tũxũ napoxcu, erü Tupanapata ya nawa namaxũne rü naxũũne. Rŭ pematama nixĩ ya yima Tupanapata na pixĩgũxũ. <sup>18</sup> Tama name i texé tũgũtama tawomũxẽẽ. Rŭ ngẽxguma petanũwa texé tũgũgu rüxĩnũgu na wũxi i duũxũ i nũxũ cuáxe na tiĩxũ i ñoma i naãnewa, rü name nixĩ i ñoma taxuũma tacuáxũrũũ tũgũ tixĩxẽẽ. Rŭ ngẽxguma tá nixĩ i wũxi i duũxũ i aixcũma nũxũ cuáxe tá tiĩxũ. <sup>19</sup> Erü ñoma i naãneãrũ cuèx rü wũxi i ngẽãẽmare nixĩ i Tupanacèx. Erü Tupanaãrũ ore i ũmatũxũwa rü ñanagũrũ:

“Rŭ ngẽma duũxũgũ i nũgũgu rüxĩnũẽxũ na nũxũ cuèxũchigũxũ yĩĩxũ, rü norü cuèxgutama Ínanatũexẽẽ ya Tupana”,  
 ñanagũrũ. <sup>20</sup> Rŭ toxnamana i Tupanaarũ orewa rü ñanagũrũ ta:

“Tórũ Cori ya Tupana rü nũxũ nacuèx na taxuwama namexũ i ngẽma norü ñnũ i ngẽma duũxũgũ i ñoma i naanewa cuèxwa ngugũxũ”,

ñanagũrũ. <sup>21</sup> Rŭ ngẽmacèx tama name i texé tũgũ ticuèxũxũ ega duũxũgũarũ cuèxwamare tarũxũxgu.. Erü Tupana rü marũ pexna nanaxã i guxũma na pexrũ yĩĩxũcèx. <sup>22</sup> Rŭ ngẽmacèx i choma i Pauru, rü taeneẽ ya Aporu, rü taeneẽ ya Pedru, rü ñoma i naãne, rü torũ maxũ, rü torũ yu, rü ñomatama i ngunexũ, rü moxũãrũ ngunexũ, rü guxũma i ngẽma rü pexrũ nixĩ. <sup>23</sup> Rŭ pematama rü Cristuarũ pixĩgũ. Rŭ Cristu rü Tupanaãrũ nixĩ.

## 4

*Yema ngúexüğü ga Ngechuchu imugüxüãrü puracüchiga*

<sup>1</sup> Rü ngëmacèx tanaxwèxe i tomaã nagu perüxĩnüê na Cristuarü puracütanüxümare na tixĩgüxü. Rü nüma nixĩ i toxü namuxü na pexü tangüexëxüçex ga yema ore ga noxri Tupanaxĩcatama nüxü cuáxü. <sup>2</sup> Rü ngëxguma texé tacü rü puracü tüxna ãxgu, rü name nixĩ i aixcüma tayanguxëê i ngëma puracü i tüxna taxãxü na ngëmaãcü itanawéxüçex na aixcüma wüxi i duüxü i mexü tixixü. <sup>3</sup> Rü ngëmacèx i ñuxma na meã chayanguxëêchaüxü i ngëma puracü i Tupana choxna ãxü, rü taxucèxma chaugücèx chaxoegaãê ega woo choxna pecagu rü êxna tacü rü ãêxgacügü choxna caxgu naxcèx i ngëma puracü i chaxüxü. Rü woo i chomatama rü taxuxüçexma íchicuèx na ngextá chixri chanaxüxü i ngëma puracü. <sup>4</sup> Natürü ñuxma na chomatama nagu charüxĩnüxü na nataxuüma i chorü chixexü i Tupanapëxewa, rü tama ngëmacèx Tupana choxü nadau na changearü pecaduãxü. Erü nümatama ya tórü Cori ya Tupana nixĩ i aixcüma choxü nacuáarü maxüãxü. <sup>5</sup> Rü ngëmacèx tama name na toxü pengugüarü maxüãxü naxüpa na núma naxüxü ya tórü Cori. Natürü name nixĩ i nüxü ípenanguxëê, erü nüma tá nixĩ i nangoxëêãxü i guxüma i ngëma ñuxma icúxü rü guxüma i ngëma duüxügü naãewa nagu rüxĩnüèxü. Rü ngëxguma tá nixĩ ya Tupana i tümamaã nataãèxü ya wüxichigü ya yixema aixcüma mexü ügüxe. <sup>6</sup> Pa Chaueneëgüx, perü mexüçèx nixĩ i pemaã nüxü tixuxü i ngëma ore na

ngema Tupana naxwèxexũãcũma pemaxẽxũ. Rũ choma rũ Aporu nixĩ i perũ cuèxruũgũ tixĩgũxũ na towa pengúexũ na Tupanaãrũ ore pemaã nũxũ ixuxũrũũãcũ penaxũxũ. Rũ ngẽmacèx tama name na wũxi i perũ ngxẽẽtaexũmaã petaãẽgũxũ rũ to rũ nũxũ pexoexũ. <sup>7</sup> Rũ ñũxma rũ pexna chaca, ¿rũ texé tixĩ ya yíxema pemaã nũxũ ixuxe na togũarũ yexera pexũ ixĩxẽexẽ? ¿Erũ guxũma i ngema cuèx i pexũ ngẽxmaxũ rũ Tupana pexna nanaxã? Rũ ñũxma na nũma pexna naxããxũ i ngẽma cuèx ¿rũ tũxcũũ pegũ picuèxũũgũ ñoma pematama perũ poramaã penayaxuxũrũũ? <sup>8</sup> Rũ pegũgu perũxĩnũẽgu rũ aixcũma marũ meãma Tupanaxũ picuèxũchi rũ marũ pexũ nangẽxma i guxũma i tacũ i penaxwèxexũ na naxũtawa pengugũxũcèx. Rũ pegũgu perũxĩnũẽgu rũ ñoma ãẽxgacũgũ i taxũrũũ pixĩgũ rũ taxuũma toxũtawa penaxwèxe i ñũxmax. ¡Chierũ aixcũma Tupanapẽxewa ãẽxgacũgũ pixĩgũgu na toma rũ ta wũxigu pemaã ãẽxgacũgũ na tixĩgũxũcèx! <sup>9</sup> Rũ toma na Ngechuchu toxũ imugũxũ, rũ chauxcèx rũ wixwe toxũ nawogũ ya Tupana. Rũ ñoma poxcuexũ i yuewa íxũrũũ tixĩgũ. Rũ ñoma wũxi i tacũ i nũxũ nacugũexũrũũ tixĩgũ i napẽxewa i Tupanaãrũ orearũ ngeruũgũ i daxũcũãx, rũ napẽxewa i ñoma i naãnecũãx i duũxũgũ, rũ napẽxewa i guxũma i tacũ i Tupana ũxũ. <sup>10</sup> Rũ ñũxma na Cristuwe tarũxĩxũ, rũ ngẽmacèx taxuũma icuáxũ toxũ nawogũ i duũxũgũ, natũrũ i pema rũ pegũgu perũxĩnũẽgu rũ guxũxũma pecuèx i Cristuchiga. Toma nũxũ tacuèx na duũxũgũpẽxewa taturaexũ, natũrũ i pema rũ pegũgu perũxĩnũẽ na aixcũma peporaexũ. Rũ duũxũgũ toxũ naxo, natũrũ pexũ

nangechaŭgü. <sup>11</sup> Rŭ ñuxma rŭ ta tama inayacuèx na ngúxŭ tingegŭxŭ, erŭ ñuxma rŭ ta taiya toxŭ nangux, rŭ tiŭawae, rŭ tangexchiru. Rŭ duŭxŭgŭ rŭ chixri tomaã nachopetŭ, rŭ tangepata. <sup>12</sup> Rŭ tipae na yeŭcŭrŭ toxmëxmaã tapuracüeechaxŭ. Rŭ duŭxŭgŭ rŭ tacŭ tomaã nixugŭe, natŭrŭ i toma rŭ mexŭ i oremaã tanangãxŭgŭ. Rŭ towe ningëxŭtanŭ, natŭrŭ yaxna namaã taxŭnŭe. <sup>13</sup> Rŭ chixri tochiga nidexagŭ, natŭrŭ i toma rŭ meã nachiga tidexagŭ. Rŭ ñoma guxchirexŭ nadaugŭxŭrŭŭ tomaã nixŭgŭ, rŭ ñoma duŭxŭgŭ i taxuwama mexŭãcŭ toxŭ nixŭxëe. Rŭ ñuxma rŭ ta ngemagutama tomaã naarŭxŭnŭe. <sup>14</sup> Tama pexcëx chanaxŭmatŭ i ñaã popera na pexŭ chaxãneëxëxŭcèx. Natŭrŭ pexcëx chanaxŭmatŭ na pexŭ chixucŭxëgŭxŭcèx chauxacŭgŭxŭchirŭŭ, erŭ pexŭ changechaŭ. <sup>15</sup> Erŭ woo nangëxmagu i muxŭma i perŭ nguxëerŭŭgŭ i Cristuchiga pexŭ ngúxëëxŭ, natŭrŭ chaxicatama nixŭ i penatŭ chiŭxŭ ga Cristuxŭ na peyaxuxŭwa. Yerŭ chauxŭtawa nixŭ ga noxri ga penayaxuxŭ ga Ngechuchu ya Cristuarŭ ore i tŭxŭ maxëxëëxŭ. Rŭ ngëmacèx chaxicatama nixŭ i penatŭ chiŭxŭ i perŭ õwa. <sup>16</sup> Rŭ ngëmacèx pexŭ chacèèxŭ na chauxrŭxŭ meã pemaxëxŭ. <sup>17</sup> Rŭ ngëmacèx pexŭtawa chanamu ya Timutéu ya poraãcŭ nŭxŭ changechaŭcŭ ya chaune ixŭcŭ i tórŭ Coriarŭ orewa. Rŭ nŭma rŭ aixcŭma meã nayanguxëe i guxŭma i ngëma nagu chanamuxŭ. Rŭ nŭma tá pexna nŭxŭ nacuèxãchixëe na ñuxãcŭ Ngechuchu ya Cristu naxwëxëxŭãcŭma meã chamaxŭxŭ rŭ chanangúxëëxŭ ga yema yaxôgŭxŭ ga natanŭgu chixŭgŭxŭ. <sup>18</sup> Rŭ ñuxre i pemagŭ rŭ pegŭ

picuèxüügü, erü nagu perüxīnūē na tagutáma pexütawa íchayadauxŭ. <sup>19</sup> Natürü ngëxguma nanaxwèxegu ya tórü Cori, rü paxa tá ngëma chaxü na pexŭ íchayadauxŭcèx. Rŭ ngëxguma rü tá chomaxŭchi nüxŭ chadau ngoxi ngëma duŭxŭgü i nügü icuèxüügüxŭ nüxŭ nangëxma i Tupanaârü pora rü ěxna yadoragŭmare. <sup>20</sup> Erü Tupanaarü pora rü tama nüxŭ tixumare, natürü nagu ítamaxē i ngema pora. <sup>21</sup> ¿Rü ñuxma rü tacü ěxna nixī i penaxwèxexŭ i pema? ¿Penaxwèxe na pexŭ chingagüxŭ i ngëxguma ngema changuxgu, rü ěxna penaxwèxe na pexŭ changechaŭácüma rü pemaã chamecŭmaácüma pexŭ na íchayadauxŭ?

## 5

### *Duŭxŭgü i chixri maxëxŭchiga*

<sup>1</sup> Rŭ duŭxŭgü nüxŭ nixugügü rü wüxi i yatü i petanüwa rü naërücŭmaâtama naxāmèx. Rŭ ngëma nixī i pecadu i poraãcü chixexŭchixŭ, erü woo ngëma duŭxŭgü i tama yaxögŭxŭtanüwa rü tama ngëmaãcü naxüpetü. <sup>2</sup> ¿Rü ñuxãcü i pema i ngëxguma i pegü picuèxüügüamaxŭ? Rŭ narümemaē chi nixī na poraãcü pengechaŭgüxŭ. Rŭ ngëma yatü i ngëma chixexŭ üxŭ rü name nixī na ípenamuxŭchixŭ i petanüwa. <sup>3</sup> Rŭ woo tama petanüwa changëxmagu i chomax, natürü guxŭguma pegu charüxīnŭ. Rŭ ñoma pexütawa changëxmaxŭrŭrŭ rü tórü Cori ya Ngechuchu ya Cristuégagu pemaã nüxŭ chixu na tacü tá namaã pexŭxŭ i ngëma duŭxŭ. <sup>4</sup> Rŭ name nixī i tórü Cori ya Ngechuchu ya Cristuégagu pengutaquëxegü. Rŭ nüma ya tórü Cori ya Ngechuchu rü tá



napetanügu na pexũ naporaexẽexücèx. Rũ choma rũ tá pexna chacuèxãchi i chorũ yumüxẽwa. <sup>5</sup> Rũ ngẽma norũ poxcu i tá nüxna pexãxũ i ngẽma yatũ, rũ ngẽma tá nixĩ na ípenamuxũchixũ i petanüwa na Chataná ngúxũ nüxũ ingexẽexücèx. Rũ ngẽmaãcü tá inayarüxo i naxũneârũ ngúchaũ i chixexũ, natürũ naãe rũ tá namaxũ i ngẽxguma wena núma naxũxgu ya tórũ Cori ya Ngechuchu. <sup>6</sup> Rũ tama name i pema rũ pegũ picuèxüũ naxcèx i ngẽma pexüxũ! ¿Tama êxna nüxũ pecuèx i ngẽma ore i ñaxũ:

“Wüxi i íraxũ i pãũârũ puxẽẽruũ rũ taxũma i pãũchara nipuxẽẽ”, ñaxũ? <sup>7</sup> Rũ ngẽmacèx name nixĩ i nüxũ perüxoe i guxũma i nuxcümaũxũ i pecüma i pexũ chixexẽexũ. Rũ ngẽxguma ngẽmaãcü penaxüxgu, rũ ñoma ngexwacaxüxũ i pãũ i ngearũ puxẽẽruũãxũ i Üpetüchigaarũ petawa ingõxürüũ tá pime. Rũ ñuxma i pema rũ aixcüma ngexwacaxüxũ i duũxügü pixígü, yerũ Cristu rũ ñoma wüxi i carnerurüũ marũ tachicüü tórũ pecaducèx nayu. <sup>8</sup> Rũ ngẽmacèx name nixĩ i nüxũ tarüxoe i nuxcümaũxũ i tacüma i chixexügü rũ aixcüma Tupanagu tarüxĩnüè rũ meã naxcèx tamaxẽ, erũ ngexwacaxüxũ i norũ duũxügü tixígü. <sup>9</sup> Nüxĩraũxũ ga chorũ poperawa rũ pemaã nüxũ chixu na tama natanügu pexãgüxũ i ngẽma duũxügü i naĩ i ngemaã naxũneârũ ngúchaũ ügüxũ. <sup>10</sup> Natürũ yexguma yema ñachagu pexũ, rũ tama pemaã nüxũ chixu na nüxna pixígachitanüxũchixũ i ngẽma duũxügü i tama yaxõgüxũ i naĩ i ngemaã maxẽmarexũ, rũ êxna ngẽma duũxügü i guxũma i tacü nügüna nugüchaũgüxũ, rũ êxna ngĩtèèxgüxũ,

rü êxna ngẽma duũxũgũ i tupananetachicũnèxãxũ icuèxũũgũxũ. Erũ ngẽxguma chi naxchaxwa ípechoũxgu i ngẽma duũxũgũ, rü chi taxucürüwa i ñoma i naãnewa pengẽxmagũ. <sup>11</sup> Natürũ yexguma pemaã nüxũ chixuxgu na tama natanũgu pexãgũxũ i ngẽma duũxũgũ i chixri maxẽxũ, rü nachiga chidexa i ngẽma duũxũgũ i nügũ ixugũxũ na peeneẽgũ i yaxõgũxũ na yixĩgũxũ natürũ naĩ i ngemaã maxẽxũ, rü êxna aũexũ, rü êxna tupananetachicũnèxãxũ icuèxũũgũxũ, rü êxna oregütèèxgũxũ, rü êxna ngãxewèxegũxũ, rü êxna ngĩtèèxgũxũ. Rũ ngẽma duũxũgũ nixĩ i pemaã nüxũ chixuxũ na tama namexũ na natanũgu pexãgũxũ rü bai i namaã na pechibüexũ. <sup>12-13</sup> Erũ tama choxmẽxwa nangẽxma na nüxna chaçaxũ i ngẽma duũxũgũ i tama Tupanaãxũ yaxõgũxũ. Rũ Tupana tá nixĩ ya nüxna çacũ i ngẽma duũxũgũ. Natürũ i pema rü pemẽxwa nangẽxma na nüxna peçaxũ i ngẽma peeneẽgũ i yaxõgũxũ i tama meã maxẽxũ. Rũ name nixĩ i petanüwa ípenamuxũchi i ngẽma duũxũ i chixri maxũxũ.

## 6

*Ngẽxguma çacũ rü guxchaxũ tüxũ ngẽxmagu taeneẽmaã, rü tama name i ãẽxgacũgũ i tama yaxõgũxũpẽxewa tayamexẽẽ i ngẽma*

<sup>1</sup> Rũ ngẽxguma wüxie i pema pexũ nangẽxmagu i çacũ rü guxchaxũ i wüxi i peeneẽ i yaxõxũmaã, çrũ tüxcũũ wüxi i ãẽxgacũ i tama yaxõxũãrũ ngũxẽècèx ípeyaca na nüma pexũ namexẽẽãxũcèx i ngẽma perũ guxchaxũgũ? çRũ tama êxna inamexũ i ngẽma peeneẽgũ i yaxõgũxũ na namexẽẽgũxũ i

ngēma perū guxchaxūgū? <sup>2</sup> ¿Tama ēxna nūxū pecuèx na yixema na yaxōgūxū tá yīxū i naāneārū guxgu nūxna icagūxū i guxūma i ñoma i naānecūāx i duūxūgū? Rū ñuxma na pema tá yīxū i ñoma i naānecūāx i duūxūgūxū picagūxū, ¿rū tūxcūū taxucürüwa i pematama penamexēē i ngēma perū guxchaxūgū i írachiréxū? <sup>3</sup> ¿Tama ēxna nūxū pecuèx rü woo ngēma daxūcūāx i Tupanaārū orearū ngeruūgū, rü yixema tá yīxū i nūxū icagūxū? Rū ngēmacèx nixī i yexeraācū pemēxwa nangēxmaxū na ñuxācū penamexēēxū i ngēma guxchaxūgū i ñoma i naānewa pexū ngēxmagūxū. <sup>4</sup> Rū ngēmacèx, ngēxguma tacū rü guxchaxū pexū ngēxmagu i ñoma i naānewa, ¿rū tūxcūū i ngēma āēxgacūgū i tama yaxōgūxūxūtawa pegū ípeyaxuaxūgūxū na pexū namexēēgūāxūcèx i ngēma? <sup>5</sup> Rū pemaā nūxū chixu i ngēma ore na pexāneēxūcèx. ¿Éxna tataxuma i petanūwa ya wūxie ya nūxū cuáxe na tanamexēēxū i ngēma guxchaxūgū i petanūwa ngēxmaxū? <sup>6</sup> Rū tama pegūmaā penuēxīcatama, natürü naetü rü āēxgacūgū i tama yaxōgūxūxūtawa pexī na penamexēēxūcèx i ngēma perū guxchaxūgū. <sup>7</sup> Rū ngēma na pegūmaā penuēxū, rü ngēma rü poraācū chixexū nixī. ¿Rū tūxcūū tama yaxna namaā pexīnūē i ngēma guxchaxūgū i peeneē pemaā ūxū? ¿Rū tūxcūū tama namaā peporae ega texé perū tacūcèx ngīxgux? <sup>8</sup> Natürü i pema rü poraācū chixexū pexūe, erü woo peeneēgū i yaxōgūxūāxū rü ta pengix.. <sup>9-10</sup> ¿Tama ēxna nūxū pecuèx na ngēma duūxūgū i chixexū ūgūxū rü nataxuxūtama i nachica i ngextá Tupana āēxgacū íyīxūwa? ¡Rü

tama name i pegütama pewomüxëëgü! Erü ngextá Tupana ãëxgacü íyíxüwa rü nataxütáma i nachica i ngëma duüxügü i naí i ngemaã ipexü, rü ngëma duüxügü i tupanetachicünëxãxü icuëxüügüxü, rü ngëma duüxügü i naxmëxëchita rü ëxna natechita ngëãëxü, rü ngëma yatügü i naxrüü yatüxümaã ngëãëxü, rü ngëma ngítëëxgüxü, rü ngëma duüxügü i nügünaxica nanuxüchixü i norü ngëmaxügü, rü ngëma duüxügü i ngãxëwëxegüxü, rü ngëma duüxügü i oregütëëxgüxü, rü ngëma duüxügü i womüxëëwëxegüxü. Rü guxüma i ngëmagü rü nataxütáma i nachica i ngextá Tupana ãëxgacü íyíxüwa. <sup>11</sup> Rü yexgumarüütama pixígü ga ñuxre ga pema ga üpax. Natürü i ñuxma ya Tupana rü marü pexü ínanapi i perü chixexü na noxrüxicatama pixígüxüçèx. Rü ñuxma rü aixcüma napëxewa pime yerü Naãë i Üünexü rü tórü Cori ya Ngechuchu ya Cristuégagu marü perü pecaduna pexü ínangüxüxëë.

### *Ñuxãcü naxüüne i taxüne*

<sup>12</sup> Rü ñuxre i pema rü ñaperügügü:

“Rü marü name na chanaxüxü i ngëma chanaxwëxexü”, ñaperügügü. Rü aixcüma nixí i ngëma, natürü tama guxü i ngëma ixügüxü rü tüxü name. Rü aixcüma nixí i Tupana choxü ínguxuchixëëxü na chanaxüxüçèx i ngëma chanaxwëxexü, natürü tama name na tacü rü chixexügu chaugü changüxëëxü na chomaã inacuáxüçèx. <sup>13</sup> Rü ngëxgumarüü ta rü ñuxre i duüxügü rü ñanagürügü:

“Rü õna rü taxü necèx nixí, rü taxüne rü õnacèx nixí”, ñanagürügü. Rü aixcüma ngëmaãcü nixí,

natürü ya Tupana rü tá inayanaxoxēē i guxūma i ngēma. Rü taxūne rü tama naī i ngemaā namaā na ingēāēmarexūcèx nixī. Erü taxūnemaā nixī i naxūxū i tórü Coriarü ngúchaū. Rü tórü Cori nixī ya taxūnexū maxēēcū. <sup>14</sup> Rü yema Tupana wena namaxēēxūrū ga tórü Cori ya Ngechuchu, rü ngēxgumarū tá ta norü poramaā wena tūxū namaxēxēē. <sup>15</sup> ¿Rü tama ēxna nūxū pecuèx na ngēma pexene rü Cristuarü na yīxū? ¿Rü ñuxācū i ngēma chaxune i Cristuarü ixīxū rü ngexū i ngēāēxūmaā inapexū? Taxucürüwama ngēmaācū nixī. <sup>16</sup> ¿Rü ēxna tama nūxū pecuèx ega wūxi i ngexū i ngēāēxūmaā inapexgu ya wūxi ya yatü rü ngēma taxre i naxūne rü wūxitama i naxūne yīxū? Erü Tupanaārü ore i ūmatūxūwa rü ñanagürü:

“Ngēma taxre i naxūne rü wūxitama i naxūne tá nixī”,

ñanagürü. <sup>17</sup> Natürü ngēxguma wūxi i duūxū rü tórü Cori ya Cristuaxū yaxōōxgu, rü ngēma naāē i ngēma duūxū rü Cristuāēmaā wūxigutama narūxīnūē. <sup>18</sup> Rü ngēmacèx name nixī na nūxū perūxoexū i pexeneārü ngúchaū na pexūxū. Rü guxūma i togü i pecadu i wūxi i duūxū ūxū rü tama naxūnexū nachixexēē. Natürü ngēma na naī i ngemaā nangēāēxū rü ngēma waxi nixī i naxūnexū chixexēēxū. <sup>19</sup> ¿Tama ēxna nūxū pecuèx i pexene rü Tupanaāē i Ūñexūpata na yīxū? Rü pegu nixī i naxāchiūxū i ngēma Naāē i Ūñexū i Tupana pexna muxū. Rü ngēmacèx i pema rü tama pegüarü yoratama pixīgü. <sup>20</sup> Erü Tupana rü marü pexcèx nataxe rü poraācū nūxū petatanü. Rü ngēmacèx penaxwèxe i ngēma pexenemaā meā Tupanacèx

pemaxē na ngēmaācū namaā penataxēēxū ya Tupa.  
pana.

## 7

### *Ucuxēgū i āmēxchiga*

<sup>1</sup> Rū ñuxma rū tá pexū changāxū ga yema āmēxchiga ga choxna naxcèx peçaxū ga perū poperawa. Rū narūmemaē chi nixī i noxtacūma tama naxāmax ya yatū. <sup>2</sup> Natürü ngēma na naxūneārü ngúchaū na naxügūmarexū i duūxügū, rū narūmemaē nixī i wūxichigū ya yatū rū na naxāmaxū, rū wūxichigū i nge rū na naxātexū. <sup>3</sup> Rū yima yatū ya āmacū rū taxucürūwama naxmēxna nügū ninuxū. Rū ngēma nge i ātecū rū taxucürūwama ngītena ngīgū iyanuxū. <sup>4</sup> Erū ngēma nge i ātecū rū tama ngīgūxūneārü yoratama iyixī, erū ngīte nixī ya ngīxīneārü yora ixīcū. Rū ngēxgumarūū ya ngīte rū tama nügūxūneārü yora nixī, erū naxmēx iyixī i naxūneārü yora ixīcū. <sup>5</sup> Rū tama name i wūxi ya yatū rū namēxna nügū ninuxū, rū ēxna wūxi i ngecū rū ngītena ngīgū iyanuxū, ega tama nügūmaā namexēēāgu na ñuxre i ngunexū tama nügūmaā namaxēxū naxcèx na nayumūxēgūxū. Rū ngēmawena rū name nixī na wenaxārü noxrirūū nügūmaā namaxēxū na tama Chataná nūxna ñnūxūcèx na chixexūgu nayixēēāxūcèx. <sup>6</sup> Rū guxūma i ñaā ore i pemaā nūxū chixuxū i āmēxchiga rū ātechiga rū tama wūxi i mu nixī i ngēma. Natürü pemaā nūxū chixumare na nūxū pecuáxūcèx na namexū i ngēmaācū na penaxūxū. <sup>7</sup> Rū chomatama nagu charūxīnū rū chierū name nixī ega choma chamaxūxūrūū

namaxêgu i guxũma i duũxũgũ. Natũrũ Tupana rũ wũxichigũ i duũxũna nanaxã i nacũma na ñuxãcũ namaxêxũcèx rũ ñuxãcũ nagu naxĩnũxũcèx. Rũ ngẽmacèx tama guxãma tawũxigu. <sup>8</sup> Rũ ngẽma ngemèxgũxũ rũ ngetegũxũ rũ yutegũxũ rũ namaã nũxũ chixu rũ narũmemaẽ nixĩ i chauxrũũ tama naxãmèx rũ tama naxãte. <sup>9</sup> Natũrũ ngẽxguma wũxi i duũxũ taxucũrũwa naxũneãrũ ngũchaũmaã naporagu, rũ name nixĩ na naxãmaxũ rũ êxna naxãtexũ. Erũ narũmemaẽ nixĩ i noxtacũma naxãmèx rũ êxna naxãte na tama ngema norũ ngũchaũgagu dũxwa chixexũgu nanguxũcèx. <sup>10</sup> Natũrũ yĩxema marũ ãmaxê rũ ãtexe, rũ tũmamaã nũxũ chixu na tama namexũ na tũmatexũ na ítatãxũ. Rũ ngẽma mu rũ tũrũ Coriarũ mu nixĩ, rũ tama choxrũ nixĩ. <sup>11</sup> Natũrũ ngẽxguma chi ngũrũãchi wũxi i ngexũ natexũ ítèxgu, rũ name nixĩ i noxtacũma nangete rũ êxna wena natecèx nataegu. Rũ ngẽxgumarũũ ta ya yatũ rũ tama name i namèxũ ínatèx. <sup>12</sup> Rũ ñuxma rũ choxũ nangẽxma i wũxi i ore i tũmacèx ya yĩxema ãmaxê ngĩmaã i wũxi i nge i tama yaxõxcũ. Rũ ngẽma ore rũ choxrũtama nixĩ rũ tama tũrũ Coriarũ nixĩ. Rũ ngẽxguma wũxi ya yatũ ya õcũ ngĩmaã ãmaxgu i wũxi i nge i tama yaxõxcũ, rũ tama name i ngĩxũ ínatèx, ega ngĩma rũ aixcũma namaã naxãtechaũgu. <sup>13</sup> Rũ ngẽxguma wũxi i nge i yaxõxcũ ãtegu namaã ya wũxi ya yatũ ya tama yaxõcũ, rũ tama name i ínatèx ya yima ngĩte ega nũma ya yima yatũ rũ aixcũma ngĩmaã naxãmèxchaũgu. <sup>14</sup> Rũ yima yatũ ya tama yaxõcũ, rũ namèx i yaxõxcũgagu Tupana nũxũ nacuèx. Rũ ngẽma ngecũ i tama yaxõxcũ, rũ ngĩte ya yaxõcũgagu Tupana ngĩxũ nacuèx. Erũ

ngëxguma chi tama ngëmaãcü yixïgu, rü chi ngëma naxãcügü rü duïxügü i tama yaxõgüxüãcügürüü tá nixïgü. Natürü i ñuxma ya naxãcügü rü marü Tupana tüxü nacuèx. <sup>15</sup> Natürü ngëxguma yima yatü ya tama yaxõcü rü namèxü ínatáxchaügu rü jnoxtacüma ngïxü ínatá! Rü ngëxgumarüü ega ngëma ngecü i tama yaxõcü rü ngïtexü ínatáxchaügu, rü jnoxtacüma ngïtexü ínatá! Rü ngëxguma ya yima yatü ya yaxõcü rü marü name ega wena naxãmèxgu. Rü ngëma ngecü i yaxõcü rü marü name ega wena naxãtegu. Erü Tupana pexü nade na pegü pengechaügxüçèx. <sup>16</sup> Rü ngëmacèx, Pa Ngecü i Tupanaãxü Yaxõxcüx, rü ngëxguma cute i tama yaxõxü cuxü ítáxchaügu, namë nixï i tama cunachüxu, erü tama nüxü cucuèx ngoxi tá nüxü cuyaxõxëë i ngëma cute rü ëxna tama. Rü cumax, Pa Yatü ya Yaxõxcüx, rü ngëxguma cuxmèx i tama yaxõxü cuxü ítáxchaügu, rü name nixï i tama cunachüxu, erü tama nüxü cucuèx ngoxi tá ngixü cuyaxõxëë i ngëma cuxmèx rü ëxna tama. <sup>17</sup> Rü ñuxma rü pemaã nüxü chixu rü nüma ga Tupana rü wüxichigü ga duïxëna nanaxã ga tümaãrü cuèx na tümaãrü maxümaã itacuáxüçèx rü meã tanaxüxüçèx i ngëma puracü ga noxri tüxü yexmaxü ga tauta Tupana tümacèx caxgu. Rü ngëma nguxëëtae nixï i namaã chanangüexëëxü i guxüma i yaxõgüxü i wüxichigü ya tupaucawa ngëxmagüxü. <sup>18</sup> Rü ngëxguma Tupana naxcèx caxgu i wüxi i duïxü i marü Yudíugürüü íwiechëxmüpëxechiraüxü, rü nüetama nixï ega ngëmaãcütama yixïgu. Rü ngëxguma Tupana nayauxgu i wüxi i duïxü i tama íwiechëxmüpëxechiraüxü, rü



nüetama nixĩ ega ngẽmaãcütama yixĩgu. <sup>19</sup> Erü Tupanapẽxewa rü nüetama nixĩ ega wüxi i duũxũ rü ínawiechèxmüpẽxechiraũgu rü éxna tama. Erü ngẽma Tupana aixcũma naxwèxexũ nixĩ na naga naxĩnũxũ i wüxichigü i duũxũ. <sup>20</sup> Rü wüxichigü i duũxũ rü name nixĩ i nawatama napuracü ga yema puracü ga nüxũ yexmaxũ ga yexguma Tupana noxri naxcèx caxgu. <sup>21</sup> Rü yexguma wüxi ga coriarü duũxũ quixĩyane Tupana cuxcèx caxgu, rü tama name i ngẽmacèx cuxoegaãë. Natürü ngẽxguma cuxũ natauxchagu na nüxna ícunguxuchixũ i ngẽma cori, rü marü name na ícunguxuchixũ. <sup>22</sup> Rü cuma ga na cucoriãxyane cuxcèx naçaxũ ga Tupana, rü name nixĩ i nüxna cucuèxãchi na Cori ya Cristu pecaduwa cuxũ ínguxuchixẽexũ. Rü cuma ga na cungearü coriãxyane cuxcèx naçaxũ ga Tupana, rü name nixĩ i nüxna cucuèxãchi na tórü Cori ya Cristuarü duũxũ quiĩxũ i ñuxma na nüxũ cupuracüxcèx. <sup>23</sup> Tupana rü marü pexcèx nataxe rü poraãcü nüxũ petatanü. ¡Rü ngẽmacèx i ñuxma rü tãütáma naga pexĩnüë i ngẽma duũxũgü i wenaxârü ñoma i naãneârü chixexũwa pexũ gagüchaũxũ! <sup>24</sup> Rü name nixĩ, Pa Chaueneëgüx, i wüxichigü i pema rü meã Tupanapẽxewa penaxüama ga yema puracü ga noxri pexũ yexmaxũ ga yexguma Tupana pexcèx caxgu. <sup>25</sup> Rü ñuxma rü tá pemaã nüxũ chixu i nachiga i ngẽma duũxũgü i ngemèxgüxũ rü ngetegüxũ. Rü tórü Cori ya Ngechuchu rü taxuũma i mu choxna naxã i ngẽmachiga. Natürü tá pemaã nüxũ chixu i ñuxãcü nagu charüxĩnü i ngẽmachiga. Rü ngẽma chorü ore rü aixcũma

nixī erū choma nixī i wūxi i duūxū ga nūxū changechaūtümüūācūma choxū nayaxuxū ga tórū Cori. <sup>26</sup> Natürü ngema ñuxma nūxū idauxū i guxchaxūgūgagu rü chauxcèx rü chi name i tama nixāmèx i ngēma yatügü i ngemèxgūxū. <sup>27</sup> Rū ngēxguma marü cuxāmèxgu rü tama name i ngīxū ícutèx. Natürü ngēxguma cungemèxgu rü name i tama cuxāmèx. <sup>28</sup> Natürü ngēxguma cuxāmèxgu rü tama pecadu nixī i ngēma. Rū ngēxguma wūxi i paxū ātegu rü tama pecadu nixī i ngēma. Natürü ngēma ixāmèxgūxū rü ixātegūxū rü tá nayexera i norü guxchaxūgü i ñoma i naānewa, rü ngēma nixī i tama chanaxwèxexū na nūxū nangupetūxū. <sup>29</sup> Pa Chaueneēgūx, pemaā nūxū chixu rü tama muxū i ngunexū tūxū nangēxma na naxūücèx i Tupanaārü puracü. Rū ngēmacèx ya yixema ixāmèxgūxe rü name nixī i meā tanaxūgü i Tupanaārü puracü ñoma tangemèxgūxūrūü. <sup>30</sup> Rū yixema ngexwaca yutanūgūxe rü yixema peta ügūxe rü yixema itaxegūxe, rü tama name i ngēmacèxTupanaārü puracü na ítangēxgūxū. <sup>31</sup> Rū yixema tūxū nangēxmaxē i tūmaārü ngēmaxūgü i ñoma i naānewa, rü tama name i ngēmacèx Tupanaārü puracü na ítangēxgūxū. Erü ñoma i naāne i ñuxma nūxū idauxū rü paxa tá nagux. <sup>32</sup> Rū tama chanaxwèxe na tacücèx pexoegaāēgūxū. Rū ngēxguma wūxi i yatü ngemèxgu, rü Tupanaārü puracügu narūxīnū rü nagu narūxīnū na ñuxācū Tupanaārü ngúchaū naxūxū. <sup>33-34</sup> Natürü ngēxguma naxāmèxgu ya wūxi ya yatü, rü ñoma i naāneārü ngēmaxūgu narūxīnū rü nagu narūxīnū na ñuxācū namèxū

nataãẽxẽẽxũ. Rũ ngẽmaãcü muxũgu narũxĩnũ. Rũ ngẽxgumarũũ ta nixĩ i ngexũgũ. Rũ ngẽma ngexũ i ngetexũ rũ Tupanaãrũ puracũgu narũxĩnũ, erũ marũ Tupanana nũgũ naxã rũ guxũ i naxũnemaã rũ naãẽmaã naxcèx namaxũ. Natürũ ngẽma ngexũ i ãtexũ rũ ñoma i naãneãrũ ngẽmaxũgu narũxĩnũ, rũ nagu narũxĩnũ na ñuxãcü natexũ nataãẽxẽẽxũ. <sup>35</sup> Rũ perũ mexũcèx nixĩ i pemaã nũxũ chixuxũ i ngẽma, rũ tama pexna na chanachuxuxũcèx nixĩ. Natürũ ngẽma ñacharũgũ na meã pemaxẽxũcèx rũ aixcũma penaxũxũcèx i tórũ Coriarũ puracũ. <sup>36</sup> Rũ ngẽxguma texé nagu rũxĩnũgu na tũmaxãcü rũ marũ na napaxũ, rũ tũmacèx namexgu na naxãtexũ, rũ marũ name i ngĩxũ taxũte ega aixcũma tũmacèx namexgu. Rũ ngẽma na naxãtexũ i tũmaxãcü rũ tama pecadu nixĩ. <sup>37</sup> Natürũ ngẽxguma wũxi i yatũ nũxũ nangẽxmagu i norũ pacũ rũ tama nanaxwèxegu na ngĩxũ naxũtexũ, rũ ngẽma rũ ta marũ name. Erũ naxmẽxwa ingẽxma rũ taxucèxma texé tanachixewe na ngĩxũ naxũtexũcèx. <sup>38</sup> Rũ ngẽmawa nũxũ tadau rũ ngẽma yatũ i naxãcü ngĩxũ ütexũ rũ mexũ naxũ. Rũ ngẽma yatũ i tama naxãcü ngĩxũ ütexũ rũ yexeraxũ i mexũ naxũ. <sup>39</sup> Rũ wũxi i nge i ãtecũ rũ ngĩtemẽxẽwa ingẽxma i ngẽxguma namaũxgu ya ngĩte. Natürũ ngẽxguma nayuxgu ya ngĩte, rũ marũ name ega to i yatũ i ngĩma ngĩxũ ngũchaũxũmaã naxãtegu. Natürũ inaxwèxe na wũxi ya yatũ ya yaxõcũmaã naxãtexũ. <sup>40</sup> Natürũ chauxcèx rũ yexeraãcü chi itaãe i ngẽxguma chi tãũ chima wena naxãtegu. Rũ ngẽma ore rũ choxrũtama nixĩ, natürũ nagu charũxĩnũ rũ Tupanaãe i Üünexũãrũ ñnũ ta nixĩ.

## 8

*Tupananetachicünèxāgūna naxuaxūgūxū ga ōnachiga*

<sup>1</sup> Ņuxma rū tá pemaã nūxū chixu i nachiga i ngēma ōnagū i ngēma duūxūgū i tama Ngechuchuaxū yaxōgūxū norū tupananetachicünèxāgūna uaxūgūxū. Rū aixcūma nixī i wūxichigū i yixema i meāma nūxū icuáxū i ngēmachiga. Natürū ngēma nūxū na icuáxūgagu rū ñuxguacū rū yigū namaã ticuèxūxū. Natürū ngēma na yigū ingechaūxū rū tūxū narūngūxēē na yexeraãcū meā yaxōgūchigūxū. <sup>2</sup> Rū ngēxguma chi texé nagu rūxīnūgu na tacūxū tacuáxū, rū name nixī i nūxna tacuèxāchi na ngēxguma rū ta tama aixcūma nūxū tacuáxū i guxūma i ngēma cuèx i aixcūma ixīxū. <sup>3</sup> Natürū ngēxguma texé aixcūma Tupanaxū ngechaūgu, rū Tupana rū tūxū nacuèx ya yíxema. <sup>4</sup> Rū ngēma na nangōxū i ngēma ōnagū i tupananetachicünèxāgūna naxuaxūgūxū i duūxūgū, rū meāma nūxū tacuèx na taxuwama namexū i ngēma tupananetachicünèxāgū erū tama aixcūma Tupanaxūchi nixīgū. Erū wūxixicatama nixī ya aixcūma Tupana ixīcū, rū nataxuma ya naī. <sup>5</sup> Rū woo duūxūgū nagu narūxīnūe rū nangexma i muxūma i tupanagū i ñoma i naanewa rū dauxūguxū i naanewa, natürū taxcèx rū tama ngemaãcū nixī. <sup>6</sup> Erū yixema nūxū tacuèx na wūxitama yixīxū ya Tupana ya Tanatū ixīcū. Rū nūma ya Tanatū nixī i naxūāxū i guxūma i tacū i ngēxmaxū, rū naxcèx nixī i imaxēxū i yixemax. Rū ngēxgumarūū ta nangēxma i wūxitama ya tórū Cori ya Ngechuchu

ya Cristu. Rū yimagagu nixī na nangēxmaxū i guxūma, rū yimagagu nixī i tūxū nangēxmaxū i maxū. <sup>7</sup> Natūrū tama guxūma i yaxōgūxū nūxū nacuēx na nangēxmaxū ya wūxitama ya Tupana rū wūxitama ya tórū Cori. Rū űuxre i nūmagū ga űpa rū nūxū nayapue na nūxū yaxōgūāxū i ngēma tupananetachicūnèxāgū, rū űuxma rū ta tama aixcūma nūxū nacuèxgū i ngēma mexū i Tupana nūxū naxwèxexū. Rū ngēmacèx nixī i űuxma i nagu naxīnūēxū na chixexū naxūgūxū i ngēxguma nangōxgūāgu i ngēma naxūnamachi i togū i duūxūgū norū tupananetachicūnèxāgūna uaxūgūxū na nūxū namaā yacuèxūūgūxūcèx. <sup>8</sup> Rū yixema nūxū tacuēx na tama tacū rū namachi na ingōxūgagu yīxū na Tupana tūxū dexū. Rū tāūtāma yexera time i napēxewa ega nangōxgūgu i ngēma namachi. Rū tāūtāma yexera tichixe i napēxewa ega tama nangōxgūgu. <sup>9</sup> Natūrū i pema i nūxū na pecuáxū na tama pecadu yīxū na nangōxū i ngēma namachi, ĵrū pexuāēgū erū ngürüāchi ngēma na pengōxūgagu chixexūgu tá penayixēē i ngēma peeneēgū i tauta aixcūma meā nūxū cuèxgūxū na tacū yīxū i Tupana nūxū naxwèxexū! <sup>10</sup> Erū cuma na meā Tupanaxū cucuáxū, rū ngēxguma chi cunangōxgu i ngēma namachi i ngextá tupananetachicūnèxāgūxū íyacuèxūūgūxūwa, rū ngürüāchi wūxi i cueneē i tauta meā Tupanaxū cuáxū tá cuxū nadau. Rū ngürüāchi nūma rū tá ta nanangōx i ngēma namachi woo naāēwa nagu naxīnūgu na wūxi i chixexū yīxū na nangōxū i ngēma namachi. <sup>11</sup> Rū ngēmaācū i cuma na meā Tupanaxū cucuáxū, rū

tá icuyanatauxēē i ngēma cueneē i Cristu naxcèx yuxū i tauta meā Tupanaxū cuáxū. <sup>12</sup> Rū ngēmacèx i ngēxguma chixexūgu cunanguxēēxgu i ngēma cueneē i tauta meā Tupanaxū cuáxū, rū Cristumaā rū ta chixexū cuxū. <sup>13</sup> Rū ngēmacèx i ngēxguma ngēma namachi i changōxūgagu chixexūgu chananguxēēxgu i chaueneē, rū narūmemaē nixī i noxtacūma taguma namachi changōx na tama pecadugu chananguxēēxūcèx i ngēma chaueneē.

## 9

*Yíxema Cristu tūxū muxē na nūxū tapuracūxūcèx, rū tūxna naxū i tūmaārū natanū*

<sup>1</sup> Rū pemaā nūxū chixu rū tórū Coritama nixī ya choxū yaxucū rū choxū mucū na norū puracū chaxūxūcèx, rū ngēmacèx taxuūma i duūxūgūmēxēwa changēxma i űuxmax. Rū chomatama chauzetūmaā tórū Cori ya Ngechuchuxū chadau, rū ngēma puracū i nūxū chaxūxūgagu nixī i peyaxōgūxū i pemax. <sup>2</sup> Rū woo togū i duūxūgū tama choxū cuèxgūchaūgu na tórū Cori choxū muxū, natūrū i pema rū meāma nūxū pecuèx na nūma yīxū ga choxū namuxū. Yerū chauxūtawa nixī ga tórū Coriaxū peyaxōgūxū, rū ngēmawa nūxū pecuèx na aixcūma yīxū na nūma choxū namuxū. <sup>3-4</sup> Rū űaā nixī i chorū dexa i namaā chanangāxūxū i ngēma duūxūgū i chauchiga idexagūxū:

“ǰÉxna tama name na duūxūgū choxna naxāxū i chorū ōna rū chorū axexū naxcèx i chorū puracū? <sup>5</sup> ǰÉxna tama inamexū ta na wūxi i ngexū i yaxōxūmaā na chaxāmaxū na chayagaxūcèx

ngëxgumarüŭ na naxãmaxŭ i Pedru, rü naëneëgü ya törü Cori, rü ngëma togü i yatügü i Tupana imugüxŭ? <sup>6</sup> ¿Rü êxna pema nagu perüxĩnüëgu rü choma rü Bernabéxicatama i tama namexŭ na toxŭ perüngŭxëëgüxŭ ngëma togü i orearü uruügüxŭ na perüngŭxëëgüxŭrüŭ? <sup>7</sup> ¿Tacü rü duŭxŭ i churawawa üxŭ i nügüxŭtama naxütanüxŭ i norü õna? ¿Rü tacü rü duŭxŭ i orix itoxŭ i tama namüxŭ i norü o? ¿Rü tacü rü duŭxŭ i carnerugüna dauxŭ i tama nagünenixŭ ne ixaxüxŭ?” Ngëma ñacharügü nüxŭ i ngëma duŭxŭgü i chauchiga idexagüxŭ. <sup>8</sup> ¿Rü ñuxma rü täütáma nagu perüxĩnüë na chorü orexicatama yĩxŭ i ñaã nüxŭ chixuxŭ! Erü Tupanaärü ore ga Moïché ümatüxŭwa rü ta ngëma ñanagürü. <sup>9</sup> Erü ngëma ore rü ñanagürü:

“¿Rü ngëma woca i aruchuarü putëxewa puracüxŭ, rü täütáma cunawëxnagu na tama yima aruchuwa nachibüxŭcèx!”

ñanagürü i ngëma ore. Rü nüxŭ tacuèx na tama wocagügu naxĩnüxŭ ga Tupana ga yexguma yema ñaxgu. <sup>10</sup> Natürü pemaã nüxŭ chixu rü tagu nixĩ ga naxĩnüxŭ ga yexguma yema ñaxgu ga Tupana. Rü tachiga nixĩ ga naxümatüxŭ ga yema ore. Erü yíxema aruchunecü úxe rü yíxema norü oarü puxwa puracüxe, rü ngëxguma tapuracüeyane rü tanaxwëxegü na ítananguxëëgüxŭ i ngëma norü o i tüxna üxŭ. <sup>11</sup> Rü toma rü wüxi ya nanetüchire ya itatoxünerüŭ tixĩgü ga yexguma pemaã nüxŭ tixuxgu ga Tupanaärü ore. ¿Rü ñuxma rü tama êxna i pexcèx namexŭ na toxna penaxãxŭ i tacü i toxŭ taxuxŭ? <sup>12</sup> Rü ngëxguma ngëma togü i orearü uruügü petanüwa nayauxgügu i ngëma nüxŭ taxuxŭ, rü maneca toma rü yexera name nixĩ

i petanüwa tanayaxu i ngẽma toxũ taxuxũ. Natürü i toma rü tama ngẽmaãcü tanaxü. Erü toma rü guxũ i guxchaxũmaã taporae na tama pexũ tanaguxchaxẽxũcèx na Cristuaxũ peyaxõgũxũ.

<sup>13</sup> Pema nüxũ pecuèx rü guxũma i duũxũgü i tupauca ya taxũnewa puracüexũ, rü ngẽma õna ya yima tupaucawa ngẽxmaxũtama nangõxgü. Rü ngẽma duũxũgü i tupaucagu Tupanacèx naxũnagü dèixũ, rü nanade i ñuxre i ngẽma namachi norü ngõxruũ.

<sup>14</sup> Rü ngẽxgumarüũ ta ya yíxema nüxũ ixugüxe i ore i tüxũ maxẽxẽexũ, rü tórü Cori nüxũ nixu rü name nixĩ i tanayauxtanü i ngema tümaarü puracü..

<sup>15</sup> Natürü i choma rü taguma ngẽmaãcü chanaxü. Rü ñuxma na pexcèx chanaxümatüxũ i ñaã popera, rü tama tacü choxna pexãxũcèx nixĩ. Erü ngẽma na taguma texéxũtawa tacücèx íchaçaxũ, rü wüxi i chorü taãe nixĩ. Rü narümemaẽ chierü nixĩ na chayuxũ naxüpa na texé choxna nayaxuxũ i ñaã taãe i choxũ ngẽxmaxũ.

<sup>16</sup> Rü ñuxma na nüxũ chixuxũ i ngẽma ore i tüxũ maxẽxẽexũ, rü taguma ngẽmacèx chaugü chicuèxüũ. Erü woetama ngẽma nixĩ i chorü puracü ga Tupana choxna ãxũ, rü ngẽmacèx taxucürüwama chanangexrü. Erü poraãcü chi chachixexügu i ngẽxguma tãũ chima nüxũ chixuxgu.

<sup>17</sup> Rü ngẽxguma chi chaugagu chítama chanaxüxgu i ngẽma puracü, rü nagu chi charüxĩnü na choxũ naxãtanüxũ. Natürü ngẽxguma Tupana choxũ muxũãcüma chanaxüxgu, rü chanaxüama erü woetama ngẽma nixĩ i chorü puracü ga Tupana choxna ãxũ.

<sup>18</sup> ¿Rü ñuxma rü tacü tá nixĩ i chorü natanü naxcèx i ngẽma puracü i chaxüxũ? Rü dücax,



rū chorū natanū nixī i ngēma taāē i chayaxuxŭ i ngēxguma ngetanūācūma nūxŭ chixuxgu i ngēma ore i tūxŭ maxēxēxŭ. Rū ngēmaācū woo Tupanapēxewa name na petanūwa chanayaxuxŭ i chorū natanū na ngēmamaā chamaxŭxŭcèx, natürü taguma texena naxcèx chaca.. <sup>19</sup> Rū woo taxŭxemēxēwa changēxma i chomax, natürü guxāmēxēwa chaugŭ changēxmaxēē, na ngēmaācū yexeraācū muxŭma i duŭxŭg ŭxŭ charŭngŭxēēxŭcèx na Cristuaxŭ yaxōgŭāxŭcèx. <sup>20</sup> Rū ngēxguma chautanŭxŭ i Yudiŭgŭtanūwa changēxmagu, rū namaā chaugŭ chawŭxiguēē na ngēmaācū nūxŭ charŭngŭxēēxŭcèx na Cristuaxŭ yaxōgŭāxŭcèx. Rū woo tama yema Moīché ūmatŭxŭ ga mugütŭŭwa changēxmagu, natürü chayanguxēēāma i ngēma mugŭ na ngēmaācū Cristuxŭtawa chanagagŭxŭ i ngēma duŭxŭgŭ i űuxma rū ta nagu īxŭ i ngēma mugŭ ga Moīché ūmatŭxŭ. <sup>21</sup> Rū ngēxguma natanūwa changēxmagu i ngēma duŭxŭgŭ i tama Yudiŭgŭ ixīgŭxŭ, rū ngēma duŭxŭgŭmaā chaugŭ chawŭxiguxēē na ngēmaācū nūxŭ charŭngŭxēēxŭcèx na Cristuaxŭ yaxōgŭāxŭcèx. Natürü taguma íchanangēx i Tupanaārŭ mugŭ erŭ guxŭguma Cristuarŭ mugütŭŭwa changēxma. <sup>22</sup> Rū ngēxguma natanūwa changēxmagu i ngēma duŭxŭgŭ i tama poraācū Cristuchigaxŭ cuèxgŭxŭ, rū choma rū ta ngēma duŭxŭgŭmaā chaugŭ chawŭxiguxēē, na ngēmaācū nūxŭ charŭngŭxēēxŭcèx na Cristuaxŭ yaxōgŭāxŭcèx. Rū ngēmaācū guxŭma i duŭxŭgŭrŭŭ chaugŭ chixīxēē, rū nagŭxŭraŭācūma naxcèx chadau na ngēmaācū

dūxwa Tupanaxūtawa chanagagūxūcèx i ñuxre i nūmagū. <sup>23</sup> Rū ngēmaācū nixī i chapuracūxū na guxūwama nanguxūcèx i ngēma ore i tūxū maxēxēxū. Erū chanaxwèxe na choma rū ta choxū nangēxmaxū i ngēma maxū i taguma gúxū, naxrū i guxūma i ngēma duūxūgū i nūxū yaxōgūxū. <sup>24</sup> Pema rū meāma nūxū pecuèx i wūxi i inūca i nawa iñaāchixū rū muxūma inaxūāchi, natūrū wūxixicatama nixī i ngēma nūxīra ínguxū rū nayaxuxū i norū āmare. Rū name nixī i pegūna pedau na Tupana pexna naxāxūcèx i ngēma perū āmare. <sup>25</sup> Guxūma i ngēma duūxūgū i nūgū ngúexēxū naxcèx i wūxi i inūca na toguegūxū naporamaexūcèx, rū meā nūgūna nadaugū na ngēmaācū nayauxgūāxūcèx i norū āmare i paxaāchiruū ixīxū. Natūrū yixema na yaxōgūxū rū yigūna tadaugū na meā naxūgūxūcèx rū meā imaxēxūcèx na nayauxgūxūcèx i tórū āmare i taguma gúxū. <sup>26</sup> Rū ngēmacèx i choma rū tama ñoma chauचितamare chiñaxūrūū chixī, rū tama ñoma tacū i nūgū dèixū i ngūrūanegumare idagūxūrūū chixī. <sup>27</sup> Rū ngēmacèx meā chaugūmaā ichacuèx na taxuūma i chaxuneārū ngúchaū chaxūxūcèx. Erū tama chanaxwèxe i mexūmaā togūxū changuxēchirēxācūma chixexū chaxū rū ngemagagu tama chanayaxu i chorū āmare.

## 10

*Nayaxucuxēgū na tama nūxū yacuèxūūgūxūcèx i tupanānetachicūnèxāgū*

<sup>1</sup> Pa Chaueneēgūx, chanaxwèxe i nūxna pecuèxāchie ga tacū nūxū na ngupetūxū ga yema nuxcūmaūgūxū ga tórū oxigū ga Moīchéwe

rũxĩxũ. Rũ pema nũxũ pecuèx rũ yexguma nawe naxĩxgu rũ wũxi ga caixanexũ napèxegu nixũ rũ nayadũxũ. Rũ guxũma ga yema duũxũgũ rũ wũxigu Moĩchémaã natũũgu nixĩxũtanũ. Rũ yexgumarũũ ta Moĩchémaã nawa nichoũ ga yema Taxtũ ga Dauchiũxũ. <sup>2</sup> Rũ guxũma ga yema duũxũgũ rũ yexguma wũxigu Moĩchémaã yema caixanexũpechitatũũgu yaxĩxũtanũgu rũ yema Taxtũ ga Dauchiũxũwa yachoũgu, rũ yemaãcũ nũgũ nangoxèègũ na Moĩchéwema naxĩxũ. <sup>3</sup> Rũ yexgumarũũ ta ga guxũma ga yema duũxũgũ nanangõxgũ ga yema pãũ ga daxũwa rüyixũ. <sup>4</sup> Rũ guxũma ga yema duũxũgũ nayaxaxgũ ga yema dexá ga Cristu nũxna ãxũ. Yerũ Cristu rũ yema duũxũgũxũ ínixũmũcũ ga yema ínaxĩxũwa, rũ nũxna nanaxã ga yema dexá ga yaxaxgũxũ. <sup>5</sup> Natũrũ narũmumaé ga yema duũxũgũ ga tama Tupanaãrũ ngũchaũ ũgũxũ. Rũ yemacèx ga yema duũxũgũ rũ yexma nayue rũ yéma nawogũ ga naxũnegũ ga dauxchitawa ga taxúema íxãpataxũwa. <sup>6</sup> Rũ guxũma ga yema nangupetũ na tórũ cuèxruũ yĩxũcè rũ tama tórũ oxigürũxũ chixexũcèxama idaugũxũcèx. <sup>7</sup> Rũ ngẽmacèx tama name i nũxũ picuèxũũgũ i tacũ rũ tupananetachicũnèxãgũ, yexgumarũũ ga ñuxre ga nũmagũ naxũgũxũrũũ. Erũ Tupanaãrũ ore i ũmatũxũwa rũ tórũ oxigũchigaxũ nixu rũ ñanagürũ:

“Rũ duũxũgũ ínarütogũ na nachibũexũcèx rũ na naxaxegũxũcèx, rũ ngẽmawena rũ inachigũ na íyayũxexũcèx”,

ñanagürũ i ngẽma ore. <sup>8</sup> Rũ tama name i yixema rũ naĩ i ngemaã itape yexgumarũũ ga ñuxre ga

nūmagū naxūgūxūrūū. Rū yemacèx wūxitama ga ngunexūgu rū nayue ga 23,000. <sup>9</sup> Rū tama name i nūxū taxū ya tórū Cori na ñuxācū yaxna tamaā naxīnūxū yexgumarūū ga ñuxre ga nūmagū naxūgūxūrūū. Rū yemacèx nixī ga yema duūxūgūxū nangōxcuxū ga āxtapegū rū nayuexū. <sup>10</sup> Rū tama name i chixexū Tupanamaā pixugū yema ñuxre ga nuxcūmaūgūxū ga tórū oxīgūrūū. Rū yemacèx ga Tupanaārū orearū ngeruū ga daxūcūāx rū nanadai. <sup>11</sup> Rū guxūma ga yema nuxcūmaxūgūxū ga duūxūgūxū ngupetūxū, rū ñomaxūcūū rū tórū cuèxruū nixī. Rū naxūmatū na ngēmawa nūxū icuáxūcèx na ñuxācū Tupana naxwèxexū na imaxēxū i yixema i ñomaūcūū. <sup>12</sup> Rū ngēmacèx ya yíxema tūgūgu ruxīnūxē na taporaxū i Tupanapēxewa, rū name nixī na meā tūgūna tadauxū na tama chixexūgu tanguxūcèx. <sup>13</sup> Rū ñuxma rū ta taguma pexcèx ínangu i ngúchaxū i chixexū i taxucūrūwama namaā yaxna pexīnūexū. Rū name nixī i Tupanana perūyoū erū nūma rū aixcūma nayanguxēē i ngema tamaā inaxunetaxū rū taxūtáma nawa pexū nawogū i ngúchaxūgū i taxucūrūwama yaxna namaā pexīnūexū. Natūrū ngexguma tá ngúchaxūgū i chixexū pexcèx ínguxgu rū nūma rū tá pexū ínapoxū na tama nagu peyixūcèx. <sup>14</sup> Rū ngēmacèx, Pa Chaueneēgū ya Pexū Changechaūgūxex, jrū nūxū perūxoe i ngema nacūmagū i tupananetachicūnèxāgūcèx naxūgūxū i ngema duūxūgū i tama yaxōgūxū! <sup>15</sup> Pemaā nūxū chixu i ngēma ore, erū chauxcèx rū duūxūgū i nūxū cuáxū pixīgū. Rū pema tátama nagu perūxīnūē i ngēma pemaā nūxū chixuxū. <sup>16</sup> Rū ngēxguma ōna i üünexūcèx

ingutaquēxegūgu, rü yaxaxgūgu ya yima binu ya üüncü rü moxē naxcēx ixāgūgu, rü ngēmaācū yigū tangoxēē na Cristu ya taxcēx nagū ibacūwe rüxīxū. Rū ngēxguma nangōxgūgu i ngēma pāu i ibūcuxū, rü ngēmaācū yigū tangoxēē na Cristu ya taxcēx naxūne ixācūwe rüxīxū. <sup>17</sup> Rū woo na imuxū i yixema, natürü wūxitama i pāu tangōxgū. Rū ngēmaācū nixī i wūxitama ixīgūxū erü wūxiwetama tarūxī. <sup>18</sup> ;Rū dūcax i ngēma Yudīugū i nangōxgūxū i ngēma naxūnamachi i Tupanacēx nadēixū! Rū ngēxguma wūxigu nūgūmaā nangōxgūāgu, rü guxūma i ngēma nangōxgūxū rü ngēmaācū nūgū nangoxēē na wūxigu Tupanawe naxīxū. <sup>19</sup> Rū űuxma na ngēma űachaxū, rü tama chanaxwēxe i nagu perūxīnūē na naxūnēxū i ngēma namachi i ngēma duūxūgū i tama yaxōgūxū norü tupananetachicūnēxācēx dēixū. Rū tama chanaxwēxe i nagu perūxīnūē na űacūwa namēxū i ngēma norü tupananetachicūnēxāgū, erü nāgearü maxūāx. <sup>20</sup> Natürü pemaā nūxū chixu rü ngēxguma ngēma duūxūgū i tama Tupanaxū cuēxgūxū, norü tupananetachicūnēxācēx nadaiāgu i űacū rü naxūna, rü tama Tupanacēx nixī i nadaiāxū, natürü ngoxogūcēx nixī i nadaiāxū. Rū tama chanaxwēxe i ngoxogūtanūxūxū pegū pixīgūxēē. <sup>21</sup> Rū pema na peyaxaxgūxū ya yima binu ya tōrū Corixū namaā picuēxūūgūcū rü taxucūrwama namaā pexāmūcū i ngēma duūxūgū i Chatanáwe rüxīxū. Rū pema na tōrū Coriarü mechawa penangōxū i ngēma ōna i nūxū namaā picuēxūūgūxū rü taxucūrwama

ngēma duūxūgū i Chatanáwe rūxīxūārū mechawa peyachibüe. <sup>22</sup> ĶRū ñuxū ñapegūxū i ñuxmax? ĶÉxna penanuxēēchaū ya tórū Cori? ĶÉxna pexcèx rū nūxū tarūporamaēgū i yixemax?

*Name nixī i taeneēarū mexūc èx tadaugū rū tama i tóxrūtama*

<sup>23</sup> Pema rū ñaperūgūgū:

“Marū name na tanaxūxū i tacū i tanaxwèxegūxū”, ñaperūgūgū. Rū aixcūma nixī i ngēma, natürū tama tūxū name i guxūma i ngēma ixūxchaūxū. Rū ngēmaācū Cristu tūxū ínanguxūxēē na naxūxūcèx i ngēma inaxwèxexū, natürū tama guxūma i ngēma ixūxū tūxū narūngūxēē na yexeraācū meā yaxōgūamachigūxūcèx. <sup>24</sup> Rū tama name nixī i tóxrūtama mexūcèx tadaugū, natürū name nixī i togūarū mexūcèx tadaugū. <sup>25</sup> Rū marū name i penangōx i nagūxūraūxū i namachi i namaā nataxegūxū, natürū taxucèxma tūxcūū naxcèx ípeca ngoxi marū tupananetagūxū namaā yacuèxūxūgūxū i namachi yixī. <sup>26</sup> Erū ñoma i naāne rū guxūma i nawa ngēxmaxū, rū tórū Cori ya Tupanaarū nixī. <sup>27</sup> Rū ngēxguma chi wūxi i duūxū i tama yaxōxū pexna uxgu na naxūtawa peyachibüexūcèx, rū chi ngēma pexīxgu, rū marū name i penangōx i guxūma i ōna i pepéxegu yaxūxūchixū. Rū taxucèxma tūxcūū naxcèx pexoegaāē rū nūxna peca na ngextá ne naxūxū i ngēma namachi i pemaā nangōxū. <sup>28</sup> Natürū ngürūāchi wūxie tá pemaā nūxū tixu rū ñatarūgū:

“Ñāā namachi rū tupananetachicünèxācèx yamèxgūxū i naxūnawa ne ūxū nixī”, ñatarūgū.

Rū ngēxguma i pema rū tama name na penangōxū i ngēma namachi na tama chixexūgu tūxū penguxēxūcèx ya yíxema pemaã nūxū ixuxe, rū tama ngēmacèx taxoegaãēxūcèx i tūmax. <sup>29</sup> Rū tama pechiga nixī i chidexaxū i ngēxguma:

“Na tama taxoegaãēxūcèx”, ñachagu. Natürü yíxema pemaã nūxū ixuxechiga nixī i chidexaxū. Natürü bexmana ngürüãchi wūxi i yaxōxū tá cuxna naca rū ñanagürü tá cuxū:

“¿Tūxcūū i togū naxcèx oegaãēxūgagu choxna cunachuxu na tama chanaxūxū i tacū i chanaxwèxexū? <sup>30</sup> Rū ngēxguma chi Tupanana moxē chaxāxgu naxcèx i ngēma òna i changōxū, ¿rū tūxcūū i ngēma ònacèx choxū quixu?” ñanagürü. <sup>31</sup> Dücèx, pemaã nūxū chixu rū name nixī i guxūma i ngēma pexūxūmaã Tupanaxū picuèxūxūgū. Rū ngexguma tacū pengoxgūgu rū exna tacū pixaxgūgu rū ēxna tacū i to pexūgūgu, rū name nixī i ngēmamaã Tupanaxū picuèxūxūgū. <sup>32</sup> Rū tama name i penaxū i tacū i togūxū chixexūgu yixēēxū, rū woo Yudíugū yixīgūgu rū ēxna tama Yudíugū yixīgūgu, rū ēxna yaxōgūxū yixīgūgu. <sup>33</sup> Rū choma rū guxūwama guxūxūma chataãēxēēchaxū. Rū ngemacèx tama chanaxū i ngema chomatama namaã chataãxēxū, natürü chanaxū i ngema togū namaã taãxēxū na ngemaãcū nūmagū rū ta nuxū nangúchaxū na yaxōgūãxū rū nayauxgūãxū i maxū i taguma gúxū.

## 11

<sup>1</sup> Rū name nixī i nagu pexī i chaucūma ngēxgumarūū i choma na Cristucūmagu

chixũxũrũũ.

*Name nixĩ i ngexũgũ rũ mexũ i nacũmagu naxĩ*

<sup>2</sup> Pa Chaueneẽgũx, pemaã chataãe erũ guxũguma chaugu perũxĩnũe rũ nagu pexĩ ga yema nguxẽetae ga pexũ changũexẽexũ. <sup>3</sup> Natũrũ chanaxwexe i nũxũ pecuex na Cristu rũ wũxichigũ i yatũeru na yĩixũ. Rũ yatũxũgũ rũ naxmexẽeru nixĩgũ ngẽxgumarũũ ya Tupana rũ Cristueru na yĩixũ. <sup>4</sup> Rũ ngẽmacex i ngẽxguma wũxi ya yatũ ngutaquẽxewa yumũxẽgu rũ ẽxna Tupanaãrũ orexũ yaxuxgu, rũ tama ínangexũchipatẽxegu, rũ ngẽma rũ wũxi i chixexũ nixĩ i Cristupẽxewa naxũxũ. <sup>5</sup> Natũrũ ngẽxguma chi wũxi i ngecũ ngutaquẽxewa yumũxẽgu rũ ẽxna Tupanaãrũ orexũ yaxuxgu, rũ chi tama ngĩgũ natũerugu, rũ ngẽma rũ wũxi i chixexũ nixĩ i ngĩtepẽxewa naxũxũ. Rũ ñoma ngĩgũ yadũeruxũrũũ iyixĩ. <sup>6</sup> Erũ ngẽxguma chi tama ngĩgũ natũeruchaũgu, rũ narũmemaẽ nixĩ i noxtacũma ngĩgũ ibeĩxeru. Natũrũ ngẽxguma chi wũxi i ngĩrũ ãne yixĩgu i ngẽma na ngĩgũ nabèixeruxũ rũ ẽxna ngĩgũ yadũeruxũ, rũ narũmemaẽ nixĩ i ngĩgũ itũeru. <sup>7</sup> Natũrũ yatũgũ rũ tama name na nũgũ natũerugũxũ. Yerũ ga Tupana rũ nũgũraũãcũ nanaxũ ga yatũ rũ Tupanachipeta nixĩ. Rũ yima yatũwa nixĩ i nangóxũ na ñuxãcũ namexẽchixũ ya Tupana. Rũ ngẽma ngecũwa nixĩ i nangóxũ na ñuxãcũ namexũ ya yatũ. <sup>8</sup> Yerũ yexguma noxri Tupana naxũxgu ga yatũ, rũ tama ngecũwa nixĩ ga naxũãxũ. Rũ ngĩma waxi nixĩ ga yatũwa ngĩxũ naxũxũ. <sup>9</sup> Rũ yatũcex nixĩ ga Tupana ngĩxũ ũxũ ga ngecũ, rũ tama ngecũcex nixĩ ga Tupana naxũxũ



ga yatü. <sup>10</sup> Rū ngēmacèx name nixī i ngīgü itüeru na duïxügüpëxewa rü Tupanaärü orearü ngeruügü i daxüçüâxgüpëxewa nangóxücèx na ngitemëxëwa nangëxmaxü. <sup>11</sup> Natürü Tupanapëxewa rü taxuüma nixī ya yatü ega natauxgu i ngecü. Rū ngëxgumarüü ta i ngecü rü taxuüma iyixī ega natauxguma ya yatü. <sup>12</sup> Yerü yexguma noxri Tupana ngīxü üxgu ga ngecü, rü yatüwa nixī ga ngīxü naxüxü. Rū ngëxgumarüü ta ya yatü rü ngecüwa nixī i nabuxü. Natürü Tupana nixī ya naxücü i guxüma i duïxügü. <sup>13</sup> Rū pematama tá penangugü rü ngoxi name na wüxi i ngecü rü tama ngīgü natüeruäcüma nayumüxëxü. <sup>14</sup> Rū woetama tórü bucüma nixī i nüxü na icuáxü na wüxi i âne yīixü na nügü namëxyaexëxü i wüxi i yatüxü. <sup>15</sup> Natürü ngeçücèx rü wüxi i mexëchixü nixī na namëxyaexü. Erü Tupana rü ngīxna nanaxā i ngīyae na ngēmamaā ngīgü natüeruxücèx. <sup>16</sup> Natürü ngëxguma chi texé ngëmachiga tügü choxügagügu, rü name nixī i nüxü tacuèx na ngëmatama yīixü i tacüma rü nacüma i guxüma i yaxôgüxü i guxünema ya tupaucagüwa.

*Duïxügü rü chixri namaā inacüëxgü ga Coriarü ðna i üünexü*

<sup>17</sup> Rū ñuxma i ñaā popera i pexcèx chaxümatüxüwa rü pemaā nüxü chixu rü nangëxma i wüxi i pecüma i chixexü i tama namaā chataāëxü. Erü chauxcèx i ngëma perü ngutaquëxegü rü pexü nachixexëë, rü tama aixcüma perü meruügü nixī. <sup>18</sup> Erü duïxügü chomaā nüxü nixugügü rü ngëxguma tórü Coricèx pengutaquëxegüüxgu rü pegü pitoye.

Rū ngāxūgu chayaxō na aixcūma yīxū i ngēma nūxū yaxugūgūxū. <sup>19</sup> Choma rū nūxū chacuèx na aixcūma woe tátama yīxū i pegū pitoyexū na ngēmawa nūxū icuáxūcèx na texégū tíxū ya yíxema aixcūma Cristuarū duūxūgū ixīgūxe. <sup>20</sup> Rū ngēma pegū na pitoyexūgagu nixī na tama aixcūma tórū Corixū picuèxūūgūācūma yīxū i penangōxū i tórū Coriarū ōna i Üünexū i ngēxguma pengutaquèxegūūxgu. <sup>21</sup> Erū ngēxguma penangōxgu i ngēma ōna i Üünexū rū wūxichigū rū peñuxāégū na pexira na penayaxuxūcèx i ngēma ōna. Rū yoxni i ngēma togū rū ngēxma nataiyae, rū togū rū nayaxaxgū ya binu ñuxmata nangāxē. <sup>22</sup> ¿Éxna pengechiūgū ecèx tama ngema pechibüexū rū pexaxegūxū? ¿Tūxcūū nūxū pexoe i ngēma togū i yaxōgūxū rū penaxāneēxēē i ngēma yaxōgūxū i ngearū ngēmaxūāxgūxū? ¿Rū tacūxū tá pemaā chixu i ñuxmax? ¿Pexcèx rū tá pemaā chataāxū? Dūcèx, pemaā nūxū chixu rū tama pemaā chataāē naxcèx i ngēma pexūgūxū.

### *Tórū Coriarū ōna i üünexūchiga*

<sup>23</sup> Rū ngema nguxēētae i pemaā nūxū chixuxū rū tórū Corixūtawatama chanayaxu. Rū yexguma tórū Cori ga Ngechuchuxū ínaxuaxūgu, rū yematama chūtaxūgu rū nūma rū nanayaxu ga wūxi ga pāū. <sup>24</sup> Rū Tupanana moxē naxā, rū yemawena rū inanabūcu, rū ñanagürü:

“Ñāā nixī i chaxune i pexcèx ichaxāxūchiga. ;Rū penangō i ñāā pāū na ngēmaācū peāēwa choxna pecuèxāchiexūcèx!” ñanagürü. <sup>25</sup> Rū yexgumarūū

ta ga chibüwena rü Ngechuchu nanayaxu ga wüxi ga pochiyu ga binuchiümaã ããcuxũ, rü ñanagürü:

“Rü daa binu rü wüxi i cuèxruũ nixĩ na ngexwacèx Tupana duũxũgümaã ixunetaxũ i maxũ i taguma gúxũchiga. Rü chaugü ya pexcèx ibacümaã nixĩ i Tupana pexũ nüxũ cuèxẽẽxũ i ngẽmachiga. Rü ngẽxguma ñuxguacü daa binu pixaxgügu rü ñuxma choma na chanaxüxürüũ tá penaxü na peãewa choxna pecuèxãchiexũcèx”, ñanagürü ga Ngechuchu. <sup>26</sup> Rü guxũguma i ngẽxguma penangõxgu i ñaã pãũ rü peyaxaxgügu ya daa binu rü ngẽmawa tá duũxũgüxũ nüxũ picuèxẽẽ na ñuxãcü tórü pecaducèx nayuxũ ga tórü Cori. Rü ngẽmaãcü tá penaxü ñuxmatáta wena nataegu i nümax.

*Texegücèx nixĩ i tórü Coriarü õna i üünexũ*

<sup>27</sup> Natürü ngẽxguma chi texe tama tügü tamexẽẽarü maxũxãcüma nangõxgu i Coriarü pãũ i üünexũ rü tayaxaxüxgu ya yima binu ya üünecü, rü pecadu taxü napewa ya tórü Cori ya taxcèx yucü rü nagü ibacü. <sup>28</sup> Rü ngẽmacèx naxüpa na tanangõxũ i ngẽma pãũ rü na tayaxaxüxũ ya yima binu, rü name nixĩ i wüxichigü meã tümaarü maxũgu tarüxĩnü ngoxi nataxuma i tacü rü chixexũ i tümaarü maxüwa. <sup>29</sup> Erü ngẽxguma tama tügü tamaxẽẽarü maxũãcüma tanangõxgu rü tayaxaxüxgu, rü tügütama poxcuwa taga. Erü tama aixcüma tayaxõ na tórü Corichiga yixĩxũ i ngema pãũ rü yima binu. <sup>30</sup> Rü ngẽmacèx nixĩ i muxũchixe i petanüwa rü pidaaweexũ rü peturaexũ, rü ñuxre i togü rü marü nayuexũ. <sup>31</sup> Natürü ngẽxguma chi tórütama maxũgu rüxĩnüegu naxüpa na nangõxũ

i ngēma Coriarü òna, rü nüma rü taxucèx tüxü napoxcue. <sup>32</sup> Natürü ngēxguma tórü Cori ñoma i tórü maxüwa tüxü poxcugu, rü ngēmaäcü tüxü inayarüwēxächixēē na tama yixcūra naāneärü guxgu tüxü napoxcuxüçèx wüxigu namaã i ngēma duüxügü i tama yaxōgüxü. <sup>33</sup> Rü ngēmacèx, Pa Chaueneēgüx, ngēxguma pengutaquēxegügu na penangōxüçèx i ngēma òna i üünexü, name nixi i pegü ípenanguxēē na guxāma wüxigu meã penangōxüçèx. <sup>34</sup> Rü ngēxguma chi texé taiyèxgu, rü name nixi i tümapatawatama tachibü na tama Tupana pexü poxcuexüçèx naxcèx na chixexü pexüexü i perü ngutaquēxegüwa. Rü ngēma to i guxchaxügü i pexü ngēxmaxü, rü choma tá chanamexēē i ngēxguma petanüwa chaxüxgu.

## 12

### *Ngēma cuèx i Tupanaãē i Üünexü tüxna āxüchiga*

<sup>1</sup> Pa Chaueneēgüx, chanaxwèxe i nüxü pecuèx na ñuxäcü yiixü i ngēma cuèx rü ñuxacü na yixixü i ngēma tauxcha i Tupanaãē i Üünexü tüxna āxü. Rü ngēmachiga nixi i pemaã nüxü chixuxchaüxü i ñuxmax. <sup>2</sup> Rü pema meãma nüxü pecuèx ga yexguma tauta Cristuaxü peyaxōgügu, rü pegü nüxna pexāgü ga tupananetachicünèxāgü ga tama idexaxü. <sup>3</sup> Rü ngēmacèx i ñuxma rü chanaxwèxe i meã nüxü pecuèx rü taxucürüwama texe ya Tupanaãē i Üünexü tümawa ngexmaxe rü chixri Ngechuchuchuga tidexa. Rü ngexgumarüxü ta rü taxucürüwama texe ngürümare tüechama rü:

“Ngechuchu rü tórü Cori nixi”, ñatarügü ega tama Tupanaãē i Üünexü tüxü muxgu na

ngēmaācū tidexaxūcèx. <sup>4</sup> Rū nūma ya Tupana rū duūxūgūna nanaxā i naguxūraū i tauchagū. Natūrū ngema Naāxē i Üünexū i nawa ne naxīxū i ngema tauchagū rū wūxitama nixī. <sup>5</sup> Nangēxma i nagúxūraūxū i Tupanaarū puracū, natūrū yima tórū Cori ya tūxna naxācū i ngema puracūgū rū wūxitama nixī. <sup>6</sup> Rū Tupanaarū pora rū nagúxūraūācū nangox. Natūrū wūxitama nixī ya yima Tanatū ya tawa gúxūraūācū nangoxēēcū i ngema norū puracū. <sup>7</sup> Rū ngema Naāē i Üünexū wūxixewachigū nanangoxēē i Tupanaarū pora i norū duūxūgūtanūwa na ngemaācū guxāarū ngūxēēruū yixīxūcèx. <sup>8</sup> Rū Naāē i Üünexū rū tūmāxena rū nanaxā i tauxcha na ucuēxū tacuāxūcèx. Rū ngēmatama Naāē i Üünexū rū togueāxū rū nanatauxchaxēē na nūxū tacuāxū na mea tangúxēētaexū i Tupanaarū ore. <sup>9</sup> Rū togue rū ngēmatama Naāē i Üünexū tūxū nanatauxchaxēē na Tupanana tarūyoexūcèx. Rū togue rū tūxna nanaxā i pora na ngēmamaā naxcèx tayataanegūxēēxūcèx i ngēma idaaweexū. <sup>10</sup> Rū togue rū tūxna nanaxā i pora na tanaxūxūcèx i mexūgū i Tupanaarū poramaā ūxū. Rū togue rū tūxū nanatauxchaēē na nūxū tixuxūcèx i Tupanaarū ore. Rū togue rū tūxna nanaxā i cuèx na nūxū tacuāxūcèx i tacū yīixū i ngoxogūarū ixīxū rū tacū yīixū i Tupanaāē i Üünexūārū ixīxū. Rū togue rū tūxna nanaxā i tauxcha na ngēma tama nūxū tacuāxū i nagawa tidexaxūcèx. Rū togue rū tūxna nanaxā i cuèx na tanangoxēēxūcèx na tacūchiga yīixū na tidexaxū ya yīxema to i nagawa idexāxe. <sup>11</sup> Rū guxūma i ngēma rū Tupanaāē

i Ūūnexūtama nixī i naxūxū. Rū nūma nixī i wūxichigū i duūxūna naxāāxū i ngēma cuèx i nūma nanaxwèxexū na nūxna naxāāxū.

*Guxāma i yaxōgūxū rū wūxitama i naxūnewa naxūgū*

<sup>12</sup> Rū duūxūxūne rū woo muxūgu nixūye, natūrū wūxitama i naxūne nixī. Rū ngexgumarūxū ta i ngema Cristuāxū yaxōgūxū rū woo namu, natūrū wūxitama i naxūnewa naxūgū. <sup>13</sup> Rū yexguma íbaiūgu rū Tupanaāē i Ūūnexū rū wūxitama i naxūne tūxū nixīgūxēē. Rū woo Yudíugū na ixīgūxū, rū ēxna tama Yudíugū na ixīgūxū, rū woo togümēxēwa ingexmagūxū rū ēxna taxúxemēxēwa ingēxmagūxū, natūrū wūxitama i naxūne tūxū nixīgūxēē i nūma i Naāē i Ūūnexū i nūxicatama ixīxū. Rū guxāma i yixema rū marū tūxna nangu i ngēma Naāē i Ūūnexū. <sup>14</sup> Wūxi i naxūne rū tama naxāmenāxamare, natūrū muxūgu nixūye. <sup>15</sup> Rū ngēxguma chi yima nacutū ñaxgu:

“Rū ñūxma na tama naxmēx chiīxū, rū ngēmacèx tama ngēma naxūnewa changēxma”, ñaxgu, rū tama ngēmacèx nūxū narūxo na ngema naxūnewa nangexmaxū. <sup>16</sup> Rū ngēxguma chi yima naxpaxchinū ñaxgu:

“Rū ñūxma na tama naxētū chiīxū, rū ngēmacèx tama naxūnewa changēxma”, ñaxgu, rū tama ngēmacèx nūxū narūxo na ngema naxūnewa nangexmaxū. <sup>17</sup> Rū ngēxguma chi guxūma i naxūne rū naxētū yixīgu, ¿rū tacūmaā chi i nūxū naxīnūxū i ngema naxūne? Rū ngēxguma chi guxūma i naxūne rū naxmachixē yixīgu,

ġrū tacūmaã chi i nūxŭ nawãxĭxŭ? <sup>18</sup> Natürü Tupana ga naxúcü ga taxüne, rü ngexta nūma ínanaxwèxexŭwa nanangexmaxēē i taeru rü tachacüügü rü taparagü. <sup>19</sup> Rŭ ngëxguma chi nataxuxgu i norü üyechigü i taxüne rü chi naxãmenèxãmare. <sup>20</sup> Rŭ ngema naxüne rü woo muxügu nixüye, natürü wüxitama i naxüne nixĭ. <sup>21</sup> Rŭ taxetü rü taxucürüwa taxmëxŭ ñanagürü:

“Choma rü tama chacuxwèxe”, ñanagürü. Rŭ ngëxgumarŭ ta i taeru rü taxucürüwa tacutügüxŭ ñanagürü:

“Choma rü tama chapexwèxe”, ñanagürü. <sup>22</sup> Natürü ngëma yexeraãcü äücümaxŭ i taxünewa, rü ngëma nixĭ i yexera nanaxwèxexŭ i taxüne. <sup>23</sup> Rŭ ngëma taxünewa yexeraãcü naxcèx ixãnexŭ, rü ngëma nixĭ i yexera meã ixüxchiruxŭ. Rŭ ngëma taxünewa ngëxmaxŭ i tama inaxwèxexŭ na nangóxŭ, rü ngëma nixĭ i yexera meã idüxüxŭ. <sup>24</sup> Natürü tama ngëmaãcü tanaxü namaã i ngëma taxünewa ngëxmaxŭ i guxãxŭma iwéxŭ. Rŭ ngëmaãcü Tupana nanaxü i taxüne, na yexeraãcü nüxna idauxücèx i ngëma yexera naxcèx ixãnexŭ. <sup>25</sup> Rŭ ngëmaãcü Tupana nanaxü i taxüne na wüxichigü i norü üye nügügu naxĭnüexücèx rü nügü nangüxëégüxücèx. <sup>26</sup> Rŭ ngëxguma chi wüxi i ngëma taxünearü üye nūxŭ nguxgux, rü guxŭma i ngëma togü i natanüxügü rü ta nūxŭ nangux. Rŭ ngëxguma chi wüxi i ngëma taxünearü üye taãëxgu, rü guxŭma i ngëma togü i natanüxügü rü ta nataãëgü. <sup>27</sup> Rŭ ñuxma i wüxichigü i pema rü Cristuxünearü üye pixĭgü, rü ngema naxünewa pexügü. <sup>28</sup> Rŭ ngëmacèx ya Tupana rü nanaxwæe

na ñaacü nügü inanuxŭ i norü duŭxŭgü: Rŭ yixema tŭxira tŭxŭ naxunetagŭxe tixĩ ya norü puracüwa tŭxŭ namugŭxe. Rŭ tŭxŭ naxuneta ya togegü na nüxŭ tixugŭxŭcèx i norü ore. Rŭ tŭxŭ naxuneta ya togegü na duŭxŭgŭxŭ tangŭxèèxŭcèx i norü ore, rŭ togegü na tanaxŭgŭxŭcèx i mexŭgü i Tupanaârü poramaã taxŭgŭxŭ. Rŭ togegü rŭ tŭxŭ nanatauxchaxèè na tanameexèèxŭcèx i idaaweexŭ, rŭ togegü na nüxŭ tarŭngŭxèègŭxŭcèx i ngema tacü nüxŭ taxuxŭ, rŭ togegü yaxŭgŭxŭârü ãèxgacŭgü na tixŭgŭxŭcèx. Rŭ tŭxŭ nanatauchaxèè ya togegü na ngèma naga i tama nüxŭ tacuáxŭwa tidexagŭxŭcèx. <sup>29</sup> Rŭ tama guxãma Tupana tŭxŭ imugŭxe tixŭgü, rŭ tama guxãma Tupanaârü orearü uruŭ tixŭgü. Rŭ tama guxãma norü orewa ngŭxèètaegŭxe tixŭgü, rŭ tama guxãma nüxŭ tacuèx na tanaxŭxŭ i mexŭgü i taxŭgü i Tupanaârü poramaã ŭxŭ. <sup>30</sup> Rŭ tama guxãma nüxŭ tacuèx na tanameèxèèxŭ i duŭxŭgü i idaaweexŭ. Rŭ tama guxãma nüxŭ tacuèx na nawa tidexagŭxŭ i wŭxi i naga i tama nüxŭ tacuáxŭ. Rŭ tama guxãma nüxŭ tacuèx na tanangŭxèèxŭ na tacüchiga yadexaxŭ i ngèma duŭxŭgü i tama nüxŭ nacuáxŭ i nagawa idexaxŭ. <sup>31</sup> Rŭ name nixĩ inaxcèx pedèux na Tupana pexna naxãxŭcèx i ngèma cuèx rŭ taxchagü i rümemaegŭxŭ.

### *Yigü na ingechaŭgŭxŭchiga*

Natürü i ñuxma rŭ tá pexŭ changŭexèè i tacü nixĩ i guxŭma i ngèma pemaã nüxŭ chixuxŭârü yexera rümemaèxŭ.



## 13

1 Rū woo togū i nagawa chideaxgu, rū woo Tupanaārū orearū ngeruūgū i daxūcūāxgawa chideaxgu, natūrū ņoma wūxi i tacū i āgaxūrūūmare chixī ega tama guxāxū changechaūgu. <sup>2</sup> Rū woo nūxū chacuèxgu na meā duūxūgūmaā nūxū chixuxū i Tupanaārū ore, rū woo nūxū chacuèxgu i guxūma i tacū i ēxūguxū i Tupanachiga, rū woo choxū natauxchagu na chorū ōmaā chayaxīgachixēēxū ya mèxpūnegū, natūrū taxuwama chame ega tama guxāxū changechaūgu. <sup>3</sup> Rū woo ngēma duūxūgū i ngearū dīeruāxgūxūxū chayanuxgu i guxūma i tacū i choxū ngēxmaxū, rū woo Tupanaārū orecèx chaugū ichaxāxgu na ūxūwa choxū yagugūxūcèx, rū taxuwama choxū name i ngēma ega tama guxāxū changechaūgu. <sup>4</sup> Rū yīxema guxāxū ngechaūxē, rū yaxna namaā taxīnū, rū namaā tamecūma. Rū tama tixāūxāchiwèxe, rū tama togūxū tūgū tarūyexera rū tama tūgū tīcuèxūū. <sup>5</sup> Rū yīxema aixcūma guxāxū ngechaūxē, rū tama taguxchigawèxe, rū tama tūgūguxicatama tarūxīnū, rū tama tanuxwèxe, rū tama nagu tarūxīnūēcha ega texé chixexū tūmamaā ūxgu. <sup>6</sup> Rū tama namaā tataāē i chixexūgū, natūrū namaā tataāē i ngēma ore i aixcūma ixīxū. <sup>7</sup> Rū yīxema aixcūma guxāxū ngechaūxē, rū yaxna namaā taxīnū, rū guxūguma nūxū tayaxō, rū guxūguma mexūgu namaā tarūxīnū, rū taguma naxchi taxai woo tacū tūmamaā naxūxgu i togū. <sup>8</sup> Rū ngēma yīgū na ingechaūxū rū tagutāma inayacuèx. Natūrū ngēma na nūxū ixuxū i Tupanaārū ore rū wūxi i ngunexūgu tá inayacuèx. Rū ngēma

tama nūxū icuáxū i nagawa na idexaxū, rü tá ta inayacuèx. Rü ngēma ñuxma nūxū icuáxū rü wūxi i ngunexūgu rü marü taxuwatáma tüxū name. <sup>9</sup> Erü ngēma tórü cuèx i ñuxma tüxū ngēxmaxū, rü Tupanapēxewa rü naxíra. Rü ngēxgumarüü ta i ngēma norü orexū na ixuxū, rü wūxi i íramarexütama nixī. <sup>10</sup> Rü guxūma i ngēma rü tá inayarüxo i ngēxguma Tupanapēxewa ingugūgu rü nūma tá guxūxūma tüxū nacuèxēēgu. <sup>11</sup> Yexguma chabuxgu ga chomax, rü wūxi ga buxürüü chidexa, rü buxū nagu rüxñnūxūgu charüxñnü, rü tama meã chauãēxū chacuèx. Natürü yexguma marü chayèxgu, rü nūxū charüxo ga guxūma ga yema chorü bucūma. <sup>12</sup> Rü ngēma ñuxma nūxū idauxū i Tupanachiga, rü ñoma wūxi i worua ya üxachametüxewa yigü idauxürüü nixī na taxcèx naxēxū. Natürü yixcūra rü tá aixcūma meã nūxūxūchi tadau ya Tupana. Rü ñuxma rü írarüwatama nūxū chacuèx i Tupanachiga. Natürü wūxi i ngunexūgu rü tá meã nūxū chacuèx i guxūma i nachiga, ngēma na Tupana meãma choxū cuáxürüü. <sup>13</sup> Rü ñuxma rü nangēxma i tomaēxpüx i nacūmagü i guxūgutáma ngexmaxū. Rü ñaãgü nixī:

1 Rü Tupanaãxū tayaxōgü

2 Rü nūxū ítananguxēē na nataeguxū ya Cristu

3 Rü nūxū tacuèx na tamücūxū ingechaūxū.

Natürü ngēma tomaēxpüxtanüwa rü ngēma rümemaexū nixī na guxāxū ingechaūxū.

*Ngẽma tama nüxũ icuáxũ i nagawa na idexaxũchiga*

<sup>1</sup> ¡Rü naxcèx pedèux na guxãxũ pengechaũxũ! Rü ngẽxgumarũũ ta name nixĩ i naxcèx pedau i ngema tauxchagũ rü ngema cuèx i Naãe i Üünexũwa ne ìxũ. Rü ngẽma cuèx i yexeraãcü penaxwaexũ nixĩ na pexũ natauxchaxũ na nüxũ pixuxũ i Tupanaarü ore. <sup>2</sup> Yíxema duũxẽ ya tama nüxũ tacuáxũ i nagawa idexaxe, rü Tupanamaã nixĩ i tidexaxũ rü tama i duũxũgũmaã, erü taxúema nüxũ tacuèx na ñuxũ ñaxũchiga yĩixũ. Rü Tupanaãe i Üünexũ nixĩ i tüxũ idexaxẽẽxũ, natürü ngẽma ore i nüxũ tixuxũ rü èxũguxũ nixĩ. <sup>3</sup> Naturü yíxema nüxũ ixuxe i Tupanaarü ore rü ngema yaxõgũxũarü ngũxẽeruxũ tixĩ, erü yexeraãcü cuèxwa tanangugũxẽ rü nüxũ tanangúchaxũxẽ i ngema ore rü tanataãẽxẽ i ngema yaxõgũxũ i ngexguma guxchaxũ nüxũ üpetügu. <sup>4</sup> Rü yíxema duũxẽ ya tama nüxũ tacuáxũ i nagawa idexaxe, rü tümacèxtama nixĩ i ngema na yexeraãcü mea Tupanaãxũ tayaxõxũcèx. Naturü yíxema nüxũ ixuxe i Tupanaarü ore rü nüxũ tixu na yexeraãcü Tupanaãxũ yaxõgũãxũcèx i guxũma i yaxõgũxũ. <sup>5</sup> Choma chierü chanaxwèxe na guxãma i pema rü ngẽma tama nüxũ pecuáxũ i nagawa na pidexagũxũ. Naturü yexeraãcü chanaxwèxe na duũxũgũmaã nüxũ pixuxũ i Tupanaarü ore. Erü ngẽma to i nagawa na pidexagũxũarü yexera narümemaẽ na togũmaã nüxũ pixuxũ i Tupanaarü ore. Naturü ngẽma to i nagawa na idexaxũ, rü name ega ngẽma yaxõgũxũmaã nüxũ ixuxgu na tacũchiga yĩixũ i ngẽma dexa, na nümagü rü

ta yexeraācū meā Tupanaāxŭ yaxōgūāxūcèx. <sup>6</sup> Rū ngēmacèx, Pa Chaueneēgūx, rū ngēxguma chi pexūtawa chaxūxgu, rū chi to i nagawa chideaxgu, ¿rū tacūwa chi pexŭ namexŭ i ngēma? Natürü ngēxguma chi pemaā nūxŭ chixuxgu i ngēma Tupana tūxŭ nūxŭ cuèxēēxŭ, rū ēxna ngēma chomatama nūxŭ chacuáxŭ na aixcūma yīxŭ, rū ēxna ngēma ēxŭguxŭ i ñuxma Tupana tūxŭ nūxŭ cuèxēēxŭ, rū ēxna tacū rū to i nguxēētae i Tupanachiga, rū ngēma waxi nixī i pexŭ mexŭ. <sup>7</sup> Rū dūcax ngēma paxetarūŭ i quena rū ēxna arpa! Rū ngēxguma tāŭ chima texé meā napaūxgu, rū tāŭ chima nūxŭ tacuèx na tacūgu tanapaxūxŭ. <sup>8</sup> Rū ngēma churaragū, rū ngēxguma norū uwanūgūmaā nūgū nadaixchaŭgu, ¿rū ñuxācū tá nūgū namexēē na nūgū nadèixūcèx ega tama meā nangógagu ya yima corneta ya dèixcèx naxcèx çaxŭne? <sup>9</sup> Rū ngēxgumarūŭ ta pexŭ nangupetū. Rū ngēxguma chi perū conūmaā nūxŭ pixuxgu i dexa i taxūema nūxŭ cuáxŭ, ¿rū ñuxācū tá nūxŭ tacuèx na ñuxŭ ñaxŭchiga yīxŭ i ngēma nūxŭ pixuxŭ? Rū ñoma ngürüanewa pidexagūxŭrūŭ tá pixīgū. <sup>10</sup> Rū aixcūma nixī i namuxŭ i nagagū i ñoma i nañnawa. Rū guxŭma i ngēma nagagū rū name naxcèx i ngēma duŭxŭgū i nawa idexagūxŭ. <sup>11</sup> Natürü ngēxguma chi tama nūxŭ chacuèxgu i ngēma naga i to i duŭxŭ chomaā nawa idexaxŭ, rū ngēma duŭxŭcèx rū ñoma to i nachiŭñnecŭāxŭrūŭ chixī, rū chauxcèx rū ñoma to i nachiŭñnecŭāxŭ i duŭxŭrūŭ nixī i nūmax. <sup>12</sup> Choma nūxŭ chacuèx rū pema rū pexŭ nangúchaŭ na pexŭ nangēxmaxŭ i ngēma nacūmagū i Tupanaāē i Üünexŭ tūxna āxŭ. Natürü

name nixī i naxcèx pedau na guxūārū yexera pexna naxāāxū i ngēma nacūmagū i namaā nūxū perūngūxēēxū i guxūma i yaxōgūxū na yexeraācū meā Tupanaāxū yaxōgūāxūcèx. <sup>13</sup> Rū ngēmacèx yíxema duūxē ya taxúema nūxū cuáxū i nagawa idexaxe, rū name nixī i Tupanana naxcèx taca na tūxna naxāāxūcèx i cuèx na togūmaā nūxū tixuxūcèx na ñuxū ñaxūchiga yīxū i ngēma nūxū tixuxū. <sup>14</sup> Rū ngēxguma chi taxúema nūxū cuáxū i nagawa chayumūxēgu, rū chauāē nixī i ngēma yumūxèxū. Natürü chomatama rū taxuūma chacuèx na tacūchiga yīxū i ngēma. <sup>15</sup> ¿Rū ñuxācū tá chayumūxēxū i ñuxmax? Rū marū name nixī ega taxúema nūxū cuáxū i nagawa chayumūxēgu, natürü chanaxwèxe i guxāma nūxū cuáxū i nagawa rū ta chayumūxē. Rū marū name nixī ega taxúema nūxū cuáxū i nagawa chawiyaegu, natürü chanaxwèxe i guxāma nūxū cuáxū i nagawa rū ta chawiyae. <sup>16</sup> Erü ngēxguma chi taxúema nūxū cuáxū i nagawa Tupanaxū quicuèxūūgu, rū yíxema duūxēgū ya ngēma irūxīnūēxē, rū taxucürüwa cumaā wūxigu Tupanaxū ticuèxūūgū, erü tama nūxū tacuèx na ñuxū ñaxūchiga yīxū i ngēma nūxū quixuxū. <sup>17</sup> Rū woo ngēma curü yumūxē rū namexēchixgu, natürü yíxema duūxēgū ya ngēma irūxīnūēxē rū taxuūma i mexū nawa tayaxu ega to i nagawa quideaxgu. <sup>18</sup> Tupanana moxē chaxā, erü perü yexera taxúema nūxū cuáxū i nagawa chidexa. <sup>19</sup> Natürü woo muxūma i ore i taxúema nūxū cuáxū i nagawa na chidexaxū, natürü ngēma yaxōgūxūārū ngutaquēxegūwa rū chauxcèx rū narümemaē chi nixī ega woo noxre i ore i

meāma nūxū icuáxūwa namaā nūxū chixuxgu i Tupanaārū ore na ngēmaācū ngēmamaā meā chanangúexēēxūcèx. <sup>20</sup> Pa Chaueneēgūx, tama name i ñoma buxūgürūū chixri nagu perūxīnūe i ngema ore i pemaā nūxū chixuxū. Rū narūmemae nixī i ñoma buxūgürūxū pegū pixīgūxēē naxchèxwa i ngema chixexū, natürū ngema peru ĩnūwa rū penaxwèxe i duūxūgū i marū yaxūrūū mea nagu perūxīnūe rū nagu pexī i ngema ore i pemaā nūxū chixuxū. <sup>21</sup> Tupanaārū ore ga nuxcūmaūxū ga norū orearū uruū ūmatūxū rū ñanagürū:

“Rū nuā tá chanamugū i to i nachiūñanecūāx i duūxūgū na to i nagawa yadexagūxūcèx namaā i ñaā Yudíugū i tama yaxōgūxū. Natürū woo ngēmaācū chanaxūxgu, rū tāūtáma chauga naxīnūē i ngēma Yudíugū i tama irūxīnūēchaūxū”,

ñanagürū ga Tupana. <sup>22</sup> Rū ngēmacèx ngēma na taxúema nūxū cuáxū i nagawa idexaxū, rū wūxi i cuèxruū nixī naxcèx i ngēma duūxūgū i tama irūxīnūēchaūxū. Rū tama duūxūgū i marū yaxōgūxūcèx nixī i ngēma. Natürū ngēma Tupanaārū orexū na ixuxū, rū duūxūgū i marū yaxōgūxūcèx nixī na yexeraācū meā Tupanaāxū yaxōgūāxūcèx. Rū tama duūxūgū i tama irūxīnūēchaūxūcèx nixī i ngēma. <sup>23</sup> Rū ngēxguma chi pema i yaxōgūxe pengutaquēxegūgu, rū guxā chima to i nagawa pidexagūgu, ¿rū ñuxū ñaxū tá ega petanūgu naxūcuxgu i wūxi i duūxū i ngēma iyarūxīnūxū rū ēxna wūxi i duūxū i tauta yaxōxū? ¿Taux ēxna i nagu tá naxīnūxū na pexāūāēgūxū i pemax? <sup>24</sup> Natürū ngēxguma chi guxāma i pema nūxū pixuxgu i Tupanaārū ore,

rū chi petanūgu naxūcuxgu i wūxi i duūxū i tama yaxōxū rū ēxna wūxi i duūxū i ngēma iyarūxīnūxū, rū tá nūxū naxīnū i ngēma Tupanaārū ore i nūxū pixuxū. Rū ngēmaācū tá nūxū nacuèx na nūma rū wūxi i pecaduāxū na yīxū. Rū nūgūgu tátama ínarūxīnū i ngēxguma nūxū naxīnūgu i ngēma nūxū pixugūexū. <sup>25</sup> Rū ngēma chixexū i nūxīcatama nūxū nacuáxū rū tá naxcèx ínicuèx. Rū nūma rū ngēxma tá nacaxāpūxū, rū tá Tupanaxū nicuèxū. Rū tá nūxū nixu na aixcūma Tupana petanūwa nangēxmaxū.

*Tama name i penaxīxāchiāxēgū i perū ngutaquewa, rū name i meamare penaxū*

<sup>26</sup> Dūcèx, Pa Chaueneēgūx, űuxma tá pemaā nūxū chixu na űuxācū tá penaxūxū ega ngēxguma pengutaquēxegūgu. Rū űuxre i pema rū marū name na Tupanaārū wiyaegu pewiyaegūxū, rū togue rū tanguxēētaegūxū, rū togue rū nūxū tixuxū i ngēma ore i Tupana tūxū nūxū cuèxēēxū, rū togue rū nawa tidexagūxū i naga i tama nūxū tacuèxgūxū, rū togue rū tanangoxēēgūxū i ngēma dexa i to i nagawa nūxū yaxugūxū. Natūrū guxūma i ngēma rū tanaxwèxe i yaxōgūxūārū ngūxēēcèx na yīxū, na yexeraācū yaxōgūāxūcèx rū meā Tupanacèx namaxēxūcèx. <sup>27</sup> Rū ngēxguma to i naga i pema tama nūxū pecuáxūwa pidexagūgu, rū name nixī i taxre rū ēxna tomaēxpūxicatama tidexagū. Rū tanaxwèxe i wūxiexira tidexa i noxri rū yixcama ya togue. Rū ngēxguma chi texé to i nagawa ideaxgu, rū name nixī na tangēxmaxū ya wūxie ya nūxū ixuchigūxe na űacūchiga yīxū i ngēma ore i to i

nagawa nūxū yaxuxū. <sup>28</sup> Natürü ngēxguma chi tatauxgu na texé nūxū ixuchigūxū na tacūchiga yīxū i ngēma ore i to i nagawa nūxū yaxuxū, rü narümemaē nixī na noxtacūma tama to i nagawa pidexagū i perū ngutaquēxewa. Rū narümemaē i wūxichigū tūxica Tupanamaāxīcatama bexma tidexa. <sup>29</sup> Rū ngēxgumarūū ta ngēxguma pengutaquēxegūgu, rü name nixī i taxre rü ēxna tomaēxpūxicatama nūxū tixu i Tupanaārū ore. Rū ngēma togū i ngutaquēxetanūxū rü name nixī na meā nangugūgūāxū i ngēma ore. <sup>30</sup> Natürü ngēxguma chi iyadexayane i wūxi i duūxū, rü Tupana tūmamaā ideaxgu ya togue ya ngema rütuxe, rü name nixī na iyanachianexū i ngēma nūxīra idexaxū na tidexaxūcèx ya yīxema duūxē ya Tupana tūmamaā idexaxe. <sup>31</sup> Rū ngēmaācū guxāma i pema na Tupana pemaā idexaxū, rü name nixī i wūxichigū ípenanguxēē na pewa nanguxū na pidexagūxū i Tupanaārū ore. Rū ngēmaācū i ngēma togū i ngutaquēxetanūxūgū rü tá Tupanachiga meā nangúe rü tá nataāēgū. <sup>32</sup> Rū ngēmaācū tanaxwèxe i meāma tūmaāēmaā itacuèx ya wūxichigū ya yīxema Tupanaārū orexū ixuxe. <sup>33-34</sup> Erū perū ngutaquēxegūwa rü Tupana nanaxwèxe na meā penaxūxū i guxūma, rü tama nanaxwèxe na ngema pexāūgatanūxū rü pegū ípetüexēēxū. Rū guxūma i togū i yaxōgūxūārū ngutaquēxegūwa rü marū nūxū nayapue na tama yadexagūxū i ngexūgū. Rū name nixī i pema rü ta ngēmaācū penaxū, erū nachuxu na yadexagūxū i ngexūgū i ngutaquēxegūwa. Rū name nixī na yatūgūga naxīnūēxū i ngexūgū, ngēma Tupanaārū ore tūxū muxūrūū. <sup>35</sup> Rū ngēxguma chi tacūxū



nacuáxchaŭgu i wüxi i ngexŭ, rü name nixĩ i nachiŭwatama natena naca i nachiga i ngẽma. Erü wüxi i ãne nixĩ ega ngutaquẽxewa yadeaxgu i wüxi i ngexŭ. <sup>36</sup> Pa CorĩtiucŭĀxgŭx, name nixĩ na nüxna pecuèxãchiexŭ na tama pewaxira ne naxŭxŭ i Tupanaãrŭ ore. Rü tama pexicatama nixĩ i penayauxgŭxŭ i ngẽma. <sup>37</sup> Rü ngẽxguma chi texé tŭgŭgu rŭxĩnŭgu na Tupanaãrŭ orearŭ uruŭ tĩxŭ rŭ ěxna tŭgŭgu tarŭxĩnŭgu na Tupanaãē i Üünexŭ tŭxna naxãxŭ i tacŭ rŭ cuèx, rü name nixĩ i nüxna tacuèxãchi na tórŭ Coriarŭ ore yĩxŭ i ñãã ore i pexcèx chaxŭmatŭxŭ. <sup>38</sup> Natŭrŭ ngẽxguma chi texé tama nüxŭ cuáxchaŭgu i ngẽma pemaã nüxŭ chixuxŭ, rü name nixĩ i tama tŭxŭ pecuáxchaŭ. <sup>39</sup> ¡Rŭ ngẽmacèx, Pa Chaueneẽgŭx, rŭ Tupanana naxcèx peca i cuèx na meãma nüxŭ pixuxŭcèx i norŭ ore! ¡Rŭ tama penachŭxu na to i nagawa yadexagŭxŭ i duŭxŭgŭ! <sup>40</sup> Rü perŭ ngutaquẽxegŭwa, rü name nixĩ na meã penaxŭxŭ i guxŭma. Rü tama name i ngema pexãŭgatanŭ rŭ pegŭ ípetüexẽē.

## 15

### *Cristu na yuwa írŭdaxŭchiga*

<sup>1</sup> Rü ñŭxmax, Pa Chaueneẽgŭx, rŭ chanaxwèxe i nüxna pecuèxãchie i ngẽma Tupanaãrŭ ore i tŭxŭ maxẽxẽxŭ ga pemaã nüxŭ chixuxŭ. Rü yematama ore nixĩ ga pema peyauxgŭxŭ. Rü ñŭxma rŭ ngẽmatama oregagu nixĩ i meã peyaxŭgŭxŭ. <sup>2</sup> Rü ngẽma oregagu nixĩ i pexŭ nangẽxmaxŭ i maxŭ i taguma gŭxŭ, ega aixcŭma guxŭguma peyaxŭgŭamagu. Natŭrŭ ngẽxguma

tama guxūguma peyaxōgūgu, rü natüçèxmamare nixĩ i ngēma perü õ. <sup>3</sup> Rü yexguma noxri petanüwa changuxgu, rü yema nüxira pexũ changuxēēxũ nixĩ ga yema chaxira togü choxũ ngxēēxũ na Cristu rü tórü pecaducèx nayuxũ, ngēma Tupanaärü ore i ümatüxüwa nüxũ yaxuxürüü. <sup>4</sup> Rü yexgumarüü ta pexũ changúexēē na ñuxãcü inatëxgüãxũ, rü ñuxãcü norü tomaëxpüx ga ngunexügu rü wena na namaxüxũ, ngēma Tupanaärü ore i ümatüxüwa nüxũ yaxuxürüü. <sup>5</sup> Rü yexgumarüü ta pexũ changúexēē ga ñuxãcü Pedrucèx na nangóxũ ga Cristu, rü ñuxãcü yixcúra rü norü ngúexügu ga yamugüxüçèx na nangóxũ. <sup>6</sup> Rü yemawena ga Cristu rü noxtacüma 500 arü yexera ga yaxōgüxüçèx nangox. Rü muxüma i ngēma duüxügu rü ñuxma rü ta namaxē, natürü nümaxũ rü marü nayue. <sup>7</sup> Rü yemawena rü Chaütiágucèx nangox, rü yixcama guxüma ga yema togü ga ngúexüçèx nangox. <sup>8</sup> Rü düxwa chowa inayacuèx ga chauxcèx rü ta na nangóxũ, woo ngürüãchimare nixĩ ga yema, ngëxgumarüü i wüxi i buxũ i tautama norü ngunexüwa nanguyane buxürüü. <sup>9</sup> Rü choma rü guxüma i ngēma togü i Tupana imugüxütüüwa chaxü. Rü ngemacèx tama name i Tupana imuxümaã choxũ naxugüxü i duüxügu, yerü nawe chingëchigü ga Tupanaärü duüxügu rü poraãcü chixexũ chaxü. <sup>10</sup> Natürü ga Tupana rü chomaã namecüma, rü ngēmacèx i ñuxma rü choxũ pedau na tacü chiixũ rü ñuxãcü na chiixũ. Rü yema chomaã na namecümaxũ rü tama natüçèxma nixĩ. Yerü choma rü guxü ga togü ga yamugüxüärü yexera chanaxü ga Tupanaärü puracü. Natürü tama chauechama

chanaxü ga yema puracü, natürü Tupana ga chomaã mecümacü rü chomaã puracücü nixĩ ga naxücü ga yema puracü na nüxü chixuxüçèx ga norü ore. <sup>11</sup> Natürü i ñuxma rü nüetama nixĩ ega woo choma chixĩgu rü êxna togü yixĩgu ga pemaã nüxü ixuxü ga yema ore. Yerü yema ore ga pemaã nüxü tixuxü, rü Tupanaärü ore i tüxü maxêẽxü nixĩ, rü yema nixĩ ga pixögüxü.

*Ñuxãcü wena tá namaxê i duïxügü i yuexü*

<sup>12</sup> Marü pemaã nüxü tixu na Cristu rü yuwa ínadxü. ¿Rü tüxcüü ñuxre i pema rü ñaperügügü:

“Yuexü rü tagutáma wena namaxê”, ñaperügügü? <sup>13</sup> Rü ngëxguma chi ngëma yuexü rü tagu chima wena namaxêgu rü yima Cristu rü tâü chima wena namaxü. <sup>14</sup> Rü yexguma chi Cristu tama wena maïxgu, rü ngëma ore i nüxü tixuxü i nachiga rü taxuwa chima name, rü natüçèxmamare chi nixĩ i perü õ. <sup>15</sup> Rü ngëxguma chi ngëmaãcü yixĩgu, rü toma i Tupanaärü orearü uruügü rü doratèèxgüxü tixĩgü. Erü nüxü tixu na Tupana Cristuxü wena maxêẽxü. Rü ngëxguma chi tama aixcüma yixĩgu na wena namaxêxü i yuexü, rü chi wüxi i doramare nixĩ na Tupana Cristuxü wena maxêẽxü. <sup>16</sup> Rü ngëxguma chi ngëma yuexü rü tagu chima wena namaxêgu, rü ga Cristu rü chi ta tâü chima wena namaxü. <sup>17</sup> Rü yexguma chi Cristu tama wena maïxgu, rü natüçèxmamare chi nixĩ i peyaxögüxü, rü ñuxma rü chi ta perü pecadugagu ipeyarütauxe. <sup>18</sup> Rü chi ngëmaãcü yixĩgu rü ngëma duïxügü i Cristuaxü yaxögüxü i marü yuexü, rü chi ta tâü chima nüxü nangëxma i maxü i taguma gúxü. <sup>19</sup> Rü ngëxguma

chi ñoma i maxüçèxicatama yixīgu na Cristuaxü yaxōgūxü, rü chi guxü i togü i duüxügüarü yexera tangechaütümüügü. <sup>20</sup> Natürü aixcūmaxüchi nixī ga Cristu ga yuwa na ínadaxü. Natanüwa i guxüma i ngēma yuexü i yixcūra tá írüdagūxü, rü Cristu nixī ga namaã inaxügücü na ínadaxü, yerü nüma nixī ga nüxīra wena namaxüxü. <sup>21</sup> Rü yexgumarüü wüxi ga yatügagu na nayuexü ga duüxügü, rü ngēxgumarüü tá ta nixī na wüxi i yatügagu wena namaxēxü i ngēma marü yuexü. <sup>22</sup> Rü ngema na Adáügagu guxāma na yuexü, rü ngēxgumarüü ta Cristugagu tá namaxēxü i guxüma i duüxügü i nüxü yaxōgūxü. <sup>23</sup> Natürü wüxichigü tá tümawa nangu na wena tamaxüxü. Rü Cristu nixī ga nüxīra maxüçü. Rü ngēxguma wena núma naxüxgu i nümax, rü ngēxguma tá nixī i wena namaxēxü i ngēma duüxügü i noxrü ixīgūxü. <sup>24</sup> Rü ngēmawena tá nixī i nagúxü i naãne. Rü ngēxguma tá nixī ya Cristu i nüxü naporamaēxü i guxüma i norü uwanügü. Rü ngēxguma tá nixī i Nanatü ya Tupana naxāãxü i guxüma na nüma namaã inacuáxüçèx. <sup>25</sup> Erü nüma ya Cristu rü āëxgacü tá nixī ñuxmatáta nüxü naporamaē i guxüma i norü uwanügü. <sup>26</sup> Rü ngēma nawa iyacuáxü i norü uwanü i tá nüxü naporamaēxü, rü yu nixī. <sup>27</sup> Yerü Tupana rü marü Cristumēxēwa nanayexmagüxēē ga guxüma. Natürü woo Tupanaärü ore nüxü ixuxgu na Cristumēxēwa nangēxmagüxü i guxüma, natürü nümatama ya Tupana rü tama Cristumēxēwa nangēxma. Yerü nüma ga Tupana nixī ga Cristumēxēwa nayexmagüxēēãxü ga guxüma. <sup>28</sup> Rü ngēxguma

guxūma Cristumēxēwa ngēxmagügu, rü ñuxūchi nūmatama ya Cristu ya Tupana Nane rü tá Nanatümēxēwa nügü nangēxmaxēē. Yerü nūma ga Tupana nixī ga Cristumēxēwa nayexmagüxēēxū ga guxūma. Rü ngēmaācū ya Tupana rü guxūmaā tá inacuèx. <sup>29</sup> Rü nangēxma i ñuxre i duūxūgü i petanūwa i Tupanaegagu yuexūchicüü íbaiūxū. ¿Rü tüxcüū ngēma naxūgü? Rü ngēxguma chi tama wena namaxēgu i duūxūgü i yuexū, ¿rü tüxcüū ngēma yuexūchicüü ínabaiū? <sup>30</sup> ¿Rü tüxcüū i toma rü guxūguma āücūmaxūwa tangēxmagü? <sup>31</sup> Pemaā nüxū chixu, Pa Chaueneēgūx, rü guxū i ngunexūgu rü āücūmaxūwa changēxma, rü tama nüxū chacuèx i tacū rü ngunexūgu Tupanaārü oregagu tá na chayuxū. Rü ngēma rü aixcūmaxūchi nixī, ngēxgumarūū na aixcūma yīxū na choxū nangēxmaxū i wūxi i taāē i taxū i ñuxma na tórü Cori ya Ngechuchu ya Cristuaxū peyaxōgūxū. <sup>32</sup> Choma rü nuā Epéchiuwa rü Tupanaārü orechigagu chorü uwanūmaā poraācū togü tachoxūgagü. Rü ñoma naēxū i idūraexūmaā togü tadēixūrūū tixīgü. ¿Natürü tacūwa choxū namexū ga yema ega chorü maxū i ñoma i naānewa choxū ngēxmaxūcēxicatama yixīgu? Rü ngēxguma chi aixcūma yixīgu na tama wena namaxēxū i yuexū, rü marü name i ñatarūgügü:

“¡Ngīxā tachibüe rü taxaxegü, erü paxa tá tayue!” ñatarūgügü. <sup>33</sup> ¡Natürü tāūtáma nawe perūxī i ngēma duūxūgü i ngēmaācū chixri ídexagūxū! Erü aixcūma nixī i ngēma ore i ñaxū:

“Rü texé ya chixexū i duūxūmaā āmücūxe, rü tüxū inayanaxoxēē i tümacūmagü i mexū”, ñaxū.

34 Rū name nixī i meã pegüãëgu perüxĩnüë rü nüxũ perüxoe i ngẽma perü chixexũgũ. Rū wüxi i perü ãne nixī na pemaã nüxũ chixuxũ rü ñuxre i pema rü tama aixcũma Cristuarü duũxũgũ pixĩgũxũ rü tama aixcũma Tupanaxũ pecuëxgũxũ.

*Ñuxãcü wena namaxẽ i yuexũgũ*

35 Natürü ngürüãchi tá texe pexna taca rü ñatarügü pexũ:

“¿Ñuxãcü tá wena namaxẽxũ i yuexũ? ¿Rü nañuxraũxũ i naxũnemaã tá ínadagũxũ?” ñatarügü tá pexũ. 36 Pa Duũxũ i Ngẽãëmarexũx jrü dücax! Rū ngëxguma wüxi ya nanetüchire itoxgu, rü nüma ya yima naxchire rü nayu na ngemaãcü naxũxücèx i ngẽma nanetü. 37 Rū ngẽma waixũmügu itoxũ, rü tama marü nanetü ixĩxũ nixī, natürü naxchire nixī ya yima itoxũne woo triguchire rü êxna ngexũrüxũmare i to i nanetüchire yixĩgu. 38 Rū ngëxguma marü inatoxguwena, rü Tupana nixī i yanaxũxëëcü ya yima nachire na nüma nanaxwëxexũãcüma yĩxücèx i ngẽma nanetü. 39 Rū tama guxũ i naxũnegü nawüxigu. Rū duũxëxũne rü nanatoraxũ, rü naëxũgũxũne rü to nixī, rü werigũxũne rü to nixī, rü choxnigũxũne rü to nixī. 40 Rū ngëxgumarũ ta nangëxma i naxũnegü i daxũguxũ i naãnecũãx, rü nangëxma i naxũnegü i ñoma i naãnecũãx. Rū ngẽma daxũguxũ i naãnecũãx i naxũnegü rü nüxũ nangëxma i noxrütama mexũ, rü ngẽma ñoma i naãnecũãx i naxũnegü rü ta nüxũ nangëxma i noxrütama mexũ. Natürü tama nawüxigu i ngẽma norü mewa. 41 Rū üëxcüarü yauracüü rü tama namaã nawüxigu i tauemacüarü yauracüü.

Rū woramacurigäarü yauracüü rü to nixĩ. Rū nügütanüwa ya woramacurigü, rü tama nawüxigu i norü yauracüüwa. <sup>42</sup> Rū ngëxgumarüü tá ta naxüpetü namaã i naxünegü i ngëma duüxügü i yuexü. Erü ngëma naxüne i noxri nüxü ngëxmaxü rü iyarüxoxwëxexü nixĩ. Natürü ngëma naxüne i tá nüxü ngëxmaxü i ngëxguma wena namaxëgu, rü ngëma rü tagutáma inayarüxo. <sup>43</sup> Rū ngëma naxüne i yuxü rü taxuwama name i ngëxguma inatëxgux. Natürü ngëxguma wena namaüxgu rü tá namexëchi. Rū ngëma naxüne i ñuxma turaxü rü ngëxguma wena namaüxgu rü tá napora. <sup>44</sup> Rū itanatëx i ngëma naxüne i ñoma i naãnecüāx ixixü. Natürü ngëxguma inadxgu, rü daxücüāx i naxüne tá nixĩ. Rū ñuxma na nangëxmaxü i naxüne i ñoma i naãnecüāx rü ngëmawa nüxü tacuèx na nangëxmaxü ta i naxüne i daxücüāx. <sup>45</sup> Tupanaärü ore i ümatüxüwa rü ñanagürü:

“Guma nüxĩraücü ga yatü ga Adáü rü nüxü nayexma ga ñoma ga naãnecüāx ga naxüne ga paxaãchi maxüxü”,

ñanagürü. Natürü ya Cristu rü daxücüāx nixĩ. Rū nüma nixĩ i tüxna naxãāxü i maxü i taguma gúxü. <sup>46</sup> Noxri rü tüxü nangëxma i ñoma i naãnecüāx i taxüne. Natürü yixcama rü Tupana tá tüxna nanaxã i to i taxüne i daxücüāx ixixü. <sup>47</sup> Guma nüxĩraücü ga yatü ga waixüümüwa ücü, rü ñoma ga naãnecüāx nixĩ. Natürü tórü Cori ya Cristu rü daxüguxü i naãnecüāx nixĩ. <sup>48</sup> Rū ngëma taxünegü i ñoma i naãnewa tüxü ngëxmaxü, rü guma Adáüxüne ga waixüümüwa ücürüü nixĩgü. Natürü ngëma naxünegü i daxüwa nüxü ngëxmaxü i duüxügü, rü Cristuxünerüü

nixīgū. <sup>49</sup> Rū ņgexgumarūū na Adáú ga waixūmwā  
 ūcūrūū na yīxū i taxūne, rū ngēxgumarūū tá ta  
 Cristu ya daxūwa ngēxmacūrūū nixī i taxūne i  
 yixcūra. <sup>50</sup> Rū dūcax, Pa Chaueneēgūx, pemaā  
 nūxū chixu rū ņaā taxūne i namachinaxcèx  
 rū naxchinèxānaxcèx, rū taxucūrūwa Tupana  
 āēxgacū íyīxūwa nangu. Erū ngēma iyarūxoxū, rū  
 taxucūrūwama Tupanaxūtawa i ngextá taxuūma  
 íyarūxoxūwa nixūcu. <sup>51</sup> Natūrū chanaxwèxe na  
 nūxū pecuáxū i wūxi i ore i ēxūguxū ga noxri  
 Tupanaxīcatama nūxū cuáxū. Rū dūcax, tāūtāma  
 guxā tayue, natūrū guxāxūne rū tá naxūchicūū.  
<sup>52</sup> Rū ngūrūāchimare wūxi i peāxētūgu tá nixī  
 i ngēma na naxūchicūūxū i taxūne i ngēxguma  
 naāneārū guxgux naxāgagu ya corneta. Rū tá  
 naxāga ya yima corneta, rū ngēxguma i ngēma  
 duūxūgū i yuexū rū tá ínarūdagu na tagutāma  
 wena nayuexūcèx. Rū yixema na imaxēxū  
 rū tá naxūchicūū i taxūnegū. <sup>53</sup> Erū ngēma  
 taxūne i yuxwèxexū rū woetama tama taixū  
 rū tá naxūchicūū. Rū wūxi i ngexwacaxūxū i  
 naxūne i aixcūma taixū rū tagutāma yuxū tá  
 nixī. <sup>54</sup> Rū ngēxguma ngēmaācū naxūchicūūgu i  
 taxūne i yuxwèxexū, rū tūxū nangēxmagu i taxūne  
 i ngexwacaxūxū i taguma yuxū, rū ngēxguma tá  
 nixī i yanguxū i Tupanaārū ore i ūmatūxū i ņaxū:  
 “Marū inayarūxo na nayuexū i duūxūgū. Rū Tu-  
 pana rū marū yuxū narüyexera. <sup>55</sup> Rū dūcax,  
 Pa Yux, ¿ngēxū i curū pora i namaā toxū  
 curüyexeraxū? ¿Rū ngēxū i ngēma cuxne i  
 namaā toxū cudèjxū?”  
 ņanagūrū i ngēma Tupanaārū ore. <sup>56</sup> Rū ngēma  
 naxne i yu, rū pecadu nixī. Erū ngēma pecadu nixī



i naporaxēēxŭ i ngēma yu na tŭxŭ nadèixŭcèx. Rŭ ngēma mugŭ ga Moĩché ũmatŭxŭ nixĩ i naporaxēēxŭ i pecadu, erŭ woo namexgu i ngēma mugŭ, natŭrŭ taxucŭrŭwama texé aixcŭma tayanguxēē. <sup>57</sup> Natŭrŭ name nixĩ i Tupanana moxē taxā yerŭ nŭma nanamu ga tŭrŭ Cori ya Ngechuchu ya Cristu na ngēma yuxŭ tŭxŭ naporamaēxēēxŭcèx. <sup>58</sup> Rŭ ngēmacèx, Pa Chaueneēgŭ ya Pexŭ Changechaŭgŭxex, rŭ name nixĩ i meā peyaxŭgŭama rŭ taguma ípenatèx i Tupanaarŭ ore. Rŭ name nixĩ i guxŭguma meā penaxŭ i tŭrŭ Coriarŭ puracŭ, erŭ pema nŭxŭ pecuèx rŭ ngēma puracŭ i nŭxŭ pexŭxŭ, rŭ tama natŭcèxma nixĩ.

## 16

### *Togŭ i yaxŭgŭxŭcèx inanutaque ga dīeru*

<sup>1</sup> Rŭ ñuxma tá pemaã nŭxŭ chixu i nachiga i ngēma dīeru i penutaquèxexŭ na namaã nŭxŭ perŭngŭxēēgŭxŭcèx i taeneēgŭ i yaxŭgŭxŭ i Yudéaanewa ngēxmagŭxŭ. Rŭ ngēma yaxŭgŭxŭ i Gárataanewa ngēxmagŭxŭ rŭ marŭ namaã nŭxŭ chixu na ngŭxŭ nanutaquèxegŭxŭ i ngēma dīeru. Rŭ chanaxwèxe i pema rŭ ta ngēxgumarŭŭ penaxŭ. <sup>2</sup> Rŭ ngema dīeru i perŭ puracŭwa ngixŭ peyaxucŭwa rŭ gŭxcŭ i yŭxŭarŭ ngunexŭgu rŭ tá ngixŭ pexā i ngēma dīeru i Tupanaarŭ ixĩcŭ. Rŭ ngŭmaã tá penguxŭ na tama ngēxguma ngema changuxguama ngŭxŭ na pedexŭcèx. <sup>3</sup> Rŭ ngēxguma petanŭwa changuxgu, rŭ tá chanaxŭmatŭ i ñuxre i poperagŭ naxcèx i taeneēgŭ i Yerucharéŭwa ngēxmagŭxŭ. Rŭ ñuxŭchi ngēma

poperamaã tá Yerucharéŭwa chanamugü i ngẽma duŭxügü i pema nüxŭ pexunetaxŭ na ngẽma ngĩxŭ nangegüxcèx i ngẽma dīeru i taeneẽgücèx ngĩxŭ penutaquẽxecü. <sup>4</sup> Rŭ ngẽxguma chi choxŭ natauxchagu na ngẽma Yerucharéŭwa chaxŭxŭ, rŭ nümagü rŭ tá wüxigu chomaã ngẽma naxĩ.

*Pauru nagu narüxñü na Corĩtiuwa naxŭxŭ*

<sup>5</sup> Choma rŭ Machedóniããnewa tá chaxŭpetü na íchayadauxcèx i taeneẽgü i ngẽma ngẽxmagüxŭ. Rŭ ngẽmawena rŭ tá petanüwa changu na pexŭ íchayadauxcèx. <sup>6</sup> Rŭ ngürüãchi tá ñuxre i ngunexügü ngẽxma petanügu charüxãŭx, rŭ bexmana ngürüãchi ngẽma petanüwa tá chanangupetüxẽ ya mucü. Rŭ ngẽxguma rŭ tá pexŭ natauxcha na choxŭ perüngŭxẽgüxŭ na ngẽma íchaxŭxchaŭxŭwa chaxŭxŭcèx. <sup>7</sup> Erü tama chanaxwèxe i paxaãchimare pexŭ chadau. Natürü petanügu charüxãŭxchaŭ i ñuxre i ngunexŭ ega chi norü ngúchaxŭ yixĩxgu ya tórü Cori. <sup>8</sup> Natürü nuã Epéchiuarü ñãnewa tá changẽxma ñuxmatáta Pētecóstearü ngunexŭwa nangu. <sup>9</sup> Erü nuã rŭ tórü Cori poraãcü choxŭ nanatauxchaxẽ na nüxŭ chapuracüxcèx rŭ nüxŭ yaxögüãxcèx i muxŭma i duŭxügü woo namu i ngẽma tama naxwèxegüxŭ na nuã chapuracüxŭ. <sup>10</sup> Rŭ ngẽxguma chi Timutéu petanüwa nguxgu, rŭ chanaxwèxe i meãma penayaxu na petanüwa nataãxŭcèx. Erü nüma rŭ ta chauxrüŭ tórü Coriarü puracüwa napuracü. <sup>11</sup> Rŭ ngẽmacèx tama chanaxwèxe i texé petanüwa nüxŭ taxoe. Natürü chanaxwèxe i nüxŭ perüngŭxẽ na taããcüma nuã naxŭxŭ na choxŭ íyadauxcèx. Erü poraãcü

íchananguxēē na nuã nanguxūcèx namaã i ngēma togū i taeneēgū. <sup>12</sup> Rū ngēma taeneē i Aporu rū poraãcū nūxū chacèexū na petanūwa íyadauxūcèx namaã i ngēma togū i taeneēgū. Natürü tama ngema naxūxchaū i ñuxmax. Natürü ngēxguma naxāchicagu rū tá ngema naxū.

*Pauru nūxū narūmoxē ga yema yaxōgūxū*

<sup>13</sup> ¡Rū pexuãēgū na taxuūma i chixexūgu peyixūcèx! ¡Rū meãma peyaxōgūama woo tacū pexū üpetūgu! Rū name nixī i peporaesima rū taxucèxma pemuūē. <sup>14</sup> Rū guxūma i ngēma pexūxū, rū name nixī i pegū pengechaūgūãcūma penaxū. <sup>15</sup> Rū dücax, Pa Chaueneēgūx, pema nūxū pecuèx na Estéfanatanūxūgū yīxū ga nūxīra yaxōgūxū ga Acayaanewa. Rū meãma nūxū pecuèxgū na ñuxācū poraãcū taeneēgū i yaxōgūxūxū na nangūxēēgūxū. <sup>16</sup> Rū chanaxwèxe i naga pexīnūē i ngēma duūxūgū i Estéfanatanūxūgürüū ixīgūxū. Rū ngēxgumarūū ta chanaxwèxe i naga pexīnūē i guxūma i ngēma duūxūgū i ñaã Tanatüarü puracūwa puracūexū rū ngūxēētaegūxū. <sup>17-18</sup> Rū ñuxma na taxucürüwama chauxütawa pengēxmagūxū, rū wūxi ga chorü taã nixī na núma naxīxū ga taeneēgū ga Estéfana rū Fortunátu rū Acáicu. Rū yema taeneēgū ga núma īxū rū pexū nixuchigagū rū yemaãcū choxū nataãxēēgū ga yema pexū na nataãxēēgūxürüū. Rū tanaxwèxe i naga pexīnūē rū nūxū pengechaū i ngēma duūxūgū i ngēmagürüū ixīgūxū. <sup>19</sup> Rū guxūma i taeneēgū i yaxōgūxū i Áchiaaneärü ñānegūwa ngēxmagūxū, rū moxē pexcèx ngema namugū. Rū Aquiru rū Prisila rū guxūma i ngēma

yaxōgūxū i Aquirupatawa ngutaquēxegūxū, rū moxē pexcèx ngema namugū naegagu ya tórū Cori. <sup>20</sup> Rū guxūma i taeneēgū i nūma ngēxmagūxū rū moxē pexcèx ngema namu. Rū chanaxwèxe i wūxichigū i pema rū pegū pengechaūgūācūma pegū perūmoxēgū. <sup>21</sup> Choma i Pauru rū choxmēxmaātama pexcèx chanaxūmatū i ñaā chorū moxē. <sup>22</sup> Rū ngēxguma chi texé tama tórū Cori ya Ngechuchu ya Cristuxū ngechaūgu, rū Tupana tá tūxū napoxcu. Rū paxa tá ínangu ya tórū Cori. <sup>23</sup> Rū chanaxwèxe i tórū Cori ya Ngechuchu ya Cristu poraācū pexū narūngūxēē.. <sup>24</sup> Rū guxāma i pema, rū poraācū pexū changechaūācūma pexū charūmoxē naegagu ya tórū Cori ya Ngechuchu ya Cristu.

Rū nuāma pexna,  
Pauru

**Tupanaarü Ore i Tóru Cori ya Ngechuchu ya  
Cristuchiga  
New Testament in Ticuna (PE:tca:Ticuna)**

copyright © 2008 Wycliffe Bible Translators, Inc.

Language: Ticuna

Translation by: Wycliffe Bible Translators, Inc.

Ticuna

tca

Peru

**Copyright Information**

© 2008, Wycliffe Bible Translators, Inc. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

**The New Testament**

in Ticuna

**© 2008, Wycliffe Bible Translators, Inc. All rights reserved.**

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-04-30

---

PDF generated using Haiola and XeLaTeX on 22 Feb 2024 from source files dated 29 Jan 2022

9d5dc22a-30be-5d26-85a9-76047f4c89e6